



玄洲集  
智

賦辭祭文  
銘

~ 16  
2400  
4





和  
2400  
夕一十

玄洲賦集卷之四目錄

賦

籍田賦

次姜天使賦

次雪霽登樓賦

遊楓岳賦

次秋心陽春賦

雷賦

辭

騎龍辭

舉帆辭

七

七覺

賦續集目錄

玄洲集

卷四

目錄

一





三十六宮都是春賦

拔劍起舞賦

鳳凰翔千仞賦

射石虎賦

筆諫賦

穗書賦已上大

河圖賦

曳尾龜賦

黃龍負舟賦

蓋車有絕足賦

鵲巢賦

臨河嘆賦

春郊牧牛圖賦

守歲賦

赤磬賦

反赤壁賦

蟪蛄賦已上小

三十六宮都是春賦

七夕賦

羅池廟

車賦

完丘賦

採菊東籬下賦

訓子賦已上純六

續辭

發棹辭

送愛州尹辭

祭文

祭亡室文

祭習靜文

祭金伯順文

祭元右尹文

祭籠巖文

祭河司諫文

卒領相致祭文

慎佐郎哀辭

哀鷹文

月出山祈雨文



天王降祈雨文

天王降再祈文

駐龍渡祈雨文

鐵吞山祈雨文

食沙井祈雨文

鐵吞山再祈文

銘

硯銘

玄洲集卷之四目錄

玄洲集卷之十二

門人慎天翊 攷

賦 六首

賦集

藉田賦

我聖上握符之十有三載倂命禮司庸舉藉田之儀  
 重粢盛也重民命也于時斗揅辰姑洗協土發膏苴  
 始葉遂乃靈考星吉采日先張宿舉三習乃設於是  
 司鍾警鑰掌漏奏刻六戎揚武而肅隊振伍兮總總  
 尊尊兮奮而方驤叱馭八神兮警蹕而迅導趨鬣鬣  
 兮走陸梁飭勾陳使按壁壘兮駕太白兮驅熒惑風  
 力 蠡之倫秉鈐而擗旄兮旅賓 今伍奮育星羅





雲布以雜襲魚鱗螭騰虎躍兮川行嶽植戚及鉞槍  
之林立彗斜夫何麾幢戟纛之婀娜也伊班正行直  
而肅穆兮儼冠紳兮齊佩笏珂珮聲節兮禮容閑又  
雍容兮規步矩列寔武疾而文徐兮霽陰闔而陽闢  
旗燈撒沙兮列炬燭乾似密星垂天而燭龍耀極於  
是聖上乃按王制參月令憲度備法服並張翠華之  
威威兮御蒼虬之蜿蟺遂登高達以東鶩兮歷靈祠  
以臻縹壇乃奠璧而薦蜚蠶祀帝農而禮后稷肅申  
敬而出之兮瑞穰穰兮委山岳於是望東南之百畝  
今臨翠幕而懋昏作封人表其壘植僕圉緻其耒耨

司農豫其青牯太常備其種種鴻臚奏耕宗伯導場  
玉趾降阡寶舄登陌芳草映袞輕塵染基洪縻總軛  
以制角兮黛帑墜而田之翠笈方舉五推告訖前  
星踵曜兮左轄繼輶厥推七九兮循法蹈則百牛齊  
首以駢蹄兮庶人耦耕而終畝紺箱旣傾五種播土  
耨夫報功農叟獻慶乃有填觀擁望競足互頌黃鬢  
亘野耄艾盈罷爭嗟迭登聲發容動元元橫目者莫  
不感跂而噎泣况近在乎從列喜溢寰區兮奪春色  
慶彌終古以炳蔚遂乃竣禮畢勞回鑿轉軸還師解  
部返旆旋曲彩棚山移而岳遷兮笳鼓殷天而應節



戲夫子于危竿今僞佛顛搖以呈詭乘獅馴虎兮  
躩踞狂騁雲鶴仙童兮炫奇以逞異西王母戴勝以  
上壽兮玉女捧盤而獻果斥清臚而擯蛾眉陋雜妖  
而疎技巧方覽圓冠與方領儼環橋而林立共投頌  
而獻謠兮遂風功而咏德于時鮎背之考鯢齒之耄  
蹠跚匍匐齧舂舞且拜且跪抗手颺言曰國本於  
民民本於食其食維何非穀不食穀乏則飢穀裕則  
活肆古列哲躬先以籍聖祖神邁曠廢罔蹈今焉復  
古帝憲王度憲度是襲唯民之福非唯民福宗社之  
福宗社攸福聖躬康億而况三五其推無世不有儲

副助耕古所罕有今推既五襲五有七神化滲潛覃  
及動息輦呻者笑語愁怨者悅懌餓莩望腹而肉骨  
僵死回生而起死奚但伸偃起甕披輦發誓而止哉  
聖上猶尚卑讓不以爲泰淡然還旆不夸不大乃有  
羣臣百揆擁庭稱賀齊叫爭頌聲震蓋壤頌曰默彼  
蒼壇在國東垠載麥載廓告稷祀農暨蠶豐隆乃降  
乃藉握索耜土跟轂以武推五乃息淑惟春宮踵皇  
乃雍增其二續相又增二二而加二其九乃極既墜  
而穀事畢回轂嘉祥以積驗謠者嘆驩飲沂洽祉涌  
墩激載賀載頌豐賀亨貢遐邇愷樂維天無外維地



無際聖澤攸屆維嶽嵩高維海洪洪聖壽攸同聖壽  
聖澤無窮無極樂無窮極

次姜天使吊箕子賦

余惟篤降其元德兮聖爲配兮賢爲侶庸祛慝允造  
乎純明兮道方聳兮治以舉比揚舟先刺以蒿楫兮  
疇或綴糟而遺醕緬殷童之孔狡兮天孰祿兮以佑  
女喚狂奴之走鬚髮兮愍沉宗又隳緒旣荒酌滅乃  
彝則兮后皇嘿兮莫女語荃爰黨夫掇芻兮榛與莽  
其雜處趨大暮兮遠景畧紛柎鑿旣齟而且齟昔乙  
祖之剪夏兮羗肅恭乎帝心中旣又兮荒又至疇不

庭其厥琛費暨說之申申兮恒納頌而攻淫遵皇路  
而迭鷺兮罔不廸乎訓音胡裔德之昧邵兮蹇背夷  
而面欽黎之眚兮揔仇予師酒池而脯林炭無辜兮  
媚妖啁樂之極兮怨之深纔到九兮旋裔鄂羨幽幽  
兮創厥今散之賂兮昌乃西天所授兮歸耄艾比胡  
爲乎剖慘梅胡爲乎監害廉來所以景附兮雷乃翺  
翔兮擁途輿仆而軸潰兮夫孰云鞭箠之可驅哀元  
元之罔有攸歸兮仰是日而顛呼蹈沸湯而莫滄兮  
內拘熬而行行順昌而逆顛兮厥理之非可誣也太  
康之自速覆兮羲與羿不可誅也火德冷兮難再噓



天實釋乎帝榆朱均之或可爲兮姚姒詎紹乎唐虞  
龍諤諤而遘殃兮有及禽之誠孚雨霈然其誰禦兮  
故後來而蘇枯光六七之既晦兮慟聖伏而賢徂眷  
西顧而有集兮應順之豈云閭闔拒少師之格言兮  
云苦口之甚茶旣淫戮慘及乎麟鳳兮反寵之以信  
廬云余惕霜乎象箸兮瞻滄天于潢汗微抱器而去  
之兮曷不念乎乃祖仁友訐而先淪兮孰匪躬而規  
輔忍銜谿而塞好兮鬼臨余之不臧任墻垣俵俵而  
嘿嘿兮感有甚乎蹇蹇之克匡俄黃鉞之涉河兮孰  
云西路之且長同三千兮會八百天下宗于一王伊

余志之慢愚兮質金石爲賢腸苟有食其從之兮又  
何異乎犬羊顧皇天不可逆兮有夏臣之逢湯彼旣  
吝我以大道兮欲經緯乎家邦爰敷奏止于九疇兮  
實綱張而目揚配羲畫而符玄兮行先略而後詳斯  
蓋曠詔乎恣恣兮不啻乎王府之嘉祥慨黃唐逝而  
遠兮諒天通而神知矧封墓而式廬兮本非余之所  
期西山隘兮北海遠又非余之所之彼旣格余之丹  
衷兮日有土汝其尸之向檀人之攸都兮樂夫天兮  
復奚疑遵遼道而越薊關非進退於用捨孰天命之  
可違兮信於穆之不已挹勺水以洪鼎兮御跋驢以



大路寶錫試其朽株兮犀革謝其堅固處荒陋而猶  
恪兮率包容乎聖度民胥聚而爭迎兮羗有喜而無  
怒爰中國而不夷兮非獨行之踽踽飽忠信篤敬以  
爲糧兮遵禮義孝悌以爲伍敷八條而化殊俗兮樂  
是國兮不求傷水就下兮風偃草幅員之罔或蹶狷  
乃君臣而父子兮遂冠冕又衣裳方鑿飲而耕食兮  
至老死而倘佯茲固羶仁而蟻聚兮如悟醒而悔狂  
肇滌濯其腥穢兮又沐之以薰芳遷薊巷而處厦兮  
去冰谷而卽房澤逾遠而彌洽兮道悠久而益光東  
珉仰其父母兮甚葵藿之傾陽儼祠墓几杖之猶存

兮雖兇燹慘火兮莫戕扶網常兮立人極商雖亡而  
有商彼忘義一時之榮已兮抑何異南面之髑髏當  
殷祚被夷而告者兮毒心痂其如瘡旣臣僕非我事  
兮又爵祿非我求越周原兮莅平壤解桎梏於天囚  
歌黍離兮眄西墟思搖搖兮不自由芬至今猶未沫  
兮激千古之惋憂倘天之已絕殷兮胡篤生此善類  
想當日之廢興兮所不免乎怨尤惟二子與三仁兮  
特高出乎前修彼獨夫之迷駮兮劇黃口之啁啾天  
胡不命乎乃兄兮從四哲高驤而躡蹠得一士猶可  
王兮矧五德齊崇而並蠱姬雖聖有師而有弟兮亦



難謂殷宗之必覆何分崩而離析兮任西師之戕戮  
肆我聖灼覲乎天意兮甘汨沒於人僕天已定兮難  
勝勢無及於破竹惟禍福之不齊兮理有難於信服  
抑天之不獨枯周兮悶東人之窮蹙遣一聖而分理  
兮視萬里猶信宿斯涵化而浴澤兮未人倫於東方  
瞻洋洋兮薦邊荆君子居兮亦何傷幸 皇明之御  
極兮聲教達乎混茫越重譯而就聖兮衛樂化而忘  
亡騁文星兮照東涯截溟海之汨洗星旣博通乎方  
誌兮究東牒於公藏肅玉節而入壇兮採風謠於農  
桑歷箕都之弘敞兮仰哲迹之愈章值皇胤之誕降

兮頌慶急於我王然未忍徒過乎逸軌乍弭節乎茲  
鄉萑與醕其孔郁兮屬吉日而辰良跪敷衽而揭虔  
兮惕薰蒿而悽涼遂爲賦而吊之兮動筆花於仙裝  
辭旣奧兮又以麗况鸞回而鳳翔大掉鞅乎騷壇兮  
踔立幟乎詞場倘夫子之有靈兮想翩翩於大荒豈  
徒格其聖靈兮將有感於穹蒼余輒忘其荒榛兮和  
擘擘於齋房系曰姬德兮升聞天廢兮人何天命兮  
靡常斯理兮則那亦白兮其馬矢之兮靡他平之壤  
兮我都殷之墟兮周畿星摘辭兮吊我聖聖有靈兮  
偕我歸臺之社兮鎬之京積茂草兮扈靡依余續招



亥洲集  
今日無歸我東戴聖兮吾道不非

次雪霽登樓韻賦

皇化神馳兮雲油雨施上屆重玄兮旁亘八荒其熙  
若晷兮數若春華咸欣胥悅兮如草之望玄黃是隄  
兮雜沓以會同誰迷不庭兮蠢不王酬遐答邇兮置  
夷貉於腹中星蓋颺馳兮恩誥孔章帝眷我東兮錫  
圭以恤嗣疇合帝价兮揀于周行爰夙夜兮跋以涉  
踔泱泱兮越聊浪王揭虔兮惕天命若葵霍之向太  
陽肅迎郊兮蹈拜以周旋步趨孔規兮悅邇乎明堂  
珮聲節兮禮容詳班以行兮委蛇而翼翼引端門兮

闢華屋文榱企兮浮柱棘于以置酒兮讌皇華造之  
法兮所刑於羣辟懿要妙兮春有脚暖仿像其仙立  
降自天兮瑞下土蔚耿光之可挹曾邇德兮凡幾日  
歛變化兮羸穢除昔倪使之臨此兮賦登樓之晚晴  
文泫泫其靈就窮鉢微而鉤精旣歌咏其白雪又崇  
美以雕楹煥增彩於朱樓鬱加聳乎飛甍狀當日之  
陪遊若共登乎蓬瀛撫銀鈎兮覩紗籠仰遺躅兮起  
遐情風撼鋪兮掠空簾况仙仗之剝剝自東爨之滔  
天蛇豕極其挐攫雖巍然而獨存歷妖氛而彫落電  
柱蝕其圯影月壁漶以壞堊屬再掃以再迎焮繹繹



以增輝哀先王奄棄此東土兮民若喪考兮痛纏于  
九圍慶新祚之繼明宜詔書之東馳星萬里之遙飛  
兮雲九天之下垂公之來兮望不極我願皇朝兮無  
以公而亟歸公之量兮海涵地大龍虎莫測兮無岸  
無畦公之儀兮夏質周文三百三千兮有官有司其  
武咄兮孔威其文葩兮益竒其詩兮玉振而金聲其  
筆兮神設而鬼施心又和而樂氣又坦而夷噫中國  
之敦化兮如遠近而風自小邦之免被髮而走之兮  
夫孰非我皇之所賜荷玄教之無爲兮皇合大於乾  
坤徹九幽以光華兮囿四海以氤氳况救焚極溺以

匡濟尤有偏於東民宜宣命兮降青丘乃弭節乎漢  
之濱王暨臣兮稽且拜疇一毛之非恩登茲樓兮和  
茲賦迹倪侯之遺精旣河懸而水瀉又鋪珠而排瓊  
後倪侯蓋百祀兮公與之兮比京豈人工之能幻合  
造化而天成忝薄軀於下風所未圖乎生平安得借  
餘光而照之兮作東藩之文明也哉

遊楓岳賦

余幼尚乎丘壑兮審幽尋遐討兮忘疲旣登宰淮之荒  
峻兮不以巖爲鄙夷聞葵岳之在治兮濱左洋之瀉  
汨實仙夫之攸窟兮紛旣玄又閬絕羗澄內兮浴外



傲凝穆兮虔潔蒙蘭芳兮澤體襲之兮以蕙鬱掇揭  
車兮佩射干擷若英與淮芬駢間車兮薜荔衣紛陸  
離兮馥馥神馬蹕而先之兮駕冷飈之翕習起巉巖  
兮越蒙茸涉紆溪兮跨濬谷出泱泱兮八聊浪乃肅  
屈乎山腹臻鴛宮而宿之兮戒早轄兮星陟涉金沙  
之瑩煇兮厲玉瀨之琮琤踰岬瑋兮粲眩攀岌琬兮  
青蒼琪林蜃兮蒼鬱瑤葉蒸兮醴莫金蓮茁兮萬挺  
玉筍抽兮千角飛澗宛延兮赴壑騁白虹之流離層  
巒岫吻兮羽霄虎豹螭龍兮奮豐而踣踣洪瀑吐雷  
而噴雪兮激飛澇以學石塊巖爭屹而競蹲兮儼玉

獅龍象之起伏神龍抱霆而蟠窟兮靈泓接乎溟碣  
角端躩踞而爬痒兮毛鬣栖於木末禽有共鳴之啁  
折兮仙鶴降膏而巢壁往來朱宮架空而泛虛兮星  
羅綺列兮照爛相燭技繫表兮絕埃塈揔玉界而金  
墀迴璀璨而燭坤兮沕琉璃與璧英旣登峻兮又臨  
幽仰重玄兮俯九溟耳肅肅兮失聞目瓊瓊兮喪精  
窮元氣之所結兮極造化之用力究二儀之表底兮  
量四海之頭脚想混沌之胚胎兮汨鴻濛又磅礴爽  
竟醒兮鳧寤况洒練其臟骨神情况兮離宅精彩越  
兮靡托忽仿洋兮交睫我喪我兮爲蝶覲業峨之靈



神兮騎紫霧而觀接言我鬼而非人兮乃楓岫之司  
命聞爾風之差異兮似非類乎俗狀苟有志乎朝聞  
兮盍從我而遠颺爰欽受兮拱爰乃先我兮棹鞅旣  
乘我以靈螭兮又挾我以清颺援素霓以爲鞭兮引  
紫虹以爲綫從之我以雲氣兮導之我以霞光竭輕  
舉而遐鶩兮若無屈而無方風澹澹兮扶轄雷磕磕  
兮擁馭遂北之乎寒門兮瞰燭龍之所御霰霜糝兮  
晦路冰雪蠹兮迷谷懾余若將慄慄兮乃班師而前  
却梁弱水之渴澆兮戾太昊之攸國憇扶疎之橙林  
兮攀黝繆之若木躡金天之皎皎兮矍矍兮矍矍而精鑠

卹乎余將南爲兮騁朱雀之煇熒觀炎德之亢熾兮  
怖祝融之威虐紛上馭而下赫兮怵流金而消石蹈  
火山與湯谷兮驚爍肌而爛體曾焉足以少留兮歎  
東馳乎濛汜觸規毀之騰穴兮壯金鴉之搏擊秣余  
龍於扶桑兮踵羲和之上昇天之門兮九鑰守夜叉  
之猙瞪遂勇進而無怍兮云余造乎上清混白玉而  
爲京兮樓十二而五城遇青牛之老史兮率衆仙而  
容與紛鞭鴻而控鶴兮擁麟鳳之泄泄靈爲我而謁  
之兮老領之日來汝余揖之而恭已兮願承風乎尊  
術老申申其詔之兮汝何妄而且忽苟欲遵夫真道



今莫先急于澄濁傾念火之俱灰兮存一氣於子丑  
完鼎器而安丹兮搜胎骨以羽翼胡不返乎在我兮  
謾彷徨乎山澤彼竒峰與絕壑兮徒憊精而娛目是  
務外而遺內兮諒徒勞而無益亟歸歟而安定兮毋  
狂馳而浪迹衆仙客之借謔兮羣指余爲狂惑余內  
省而猶疑兮將欲返而未克靈導余以徑造兮儼肉  
髻之金釋降毒龍兮馴猛豹頂千佛使聞法曰余已  
通兮他心兮爾無辭以更白唯五奸與七賊兮乃自  
家之讎敵宜悟法於指輪兮齷狂塵於六隙雖觀心  
於一壁兮已優游於極樂胡爾盲之昧是兮謾憑嘯

而臨谷彼千峰之森爽兮顧於汝兮贅客敢昧昧而  
俛俛兮恐勞形而悴色阿與哥之啞啞兮咸目我以  
走肉羗潛縮而靡悔兮抑聽瑩其不確靈勉我而直  
趨兮達素王之所宮聖法服而端拱兮藹三千之攸  
同前四聖與十哲肅列侍而閭侃余罄折而拜叩兮  
聖諄諄其不倦曰有止而斯定兮乃君子所惓惓胡  
不誠乎處獨兮恣橫奔乎巖谷苟卓爾而有立兮室  
雖暗而生白將爾氣之巖巖兮比泰山與喬岳庶峻  
極而齊天兮詎丘巒之足詭疇學山而自畫兮仁者  
以後樂此過迴爾之遐軌兮反初服而無怠余悲淚



而迥悟兮服聖謨之提耳曩余亡羊乎歧路兮失指南於迷軌彼一玄而一空兮舉非余之所事執二柄而就質兮師格言而歸一今虛徃而實歸兮誓服膺而勿失僕夫悲余馬懷兮倦踟顧乎故國靈催余而復路兮遂返旆而迴軸唯此舉之緬邈兮實有賴乎山靈靈苟嗇乎誘我兮焉所得乎此行旣浮游乎四極兮又清都之廣漠佩仙佛之炯戒兮服先師之明則覲諸聖乎諸天兮受三教之宗派茲余所以感悟兮敬爲靈而一謝靈偃蹇而玄嘿兮迅退舉而炯焮乍遽遽其欠伸兮報黃梁之未熟噫金剛之明爽兮

豈徒暢其遐矚能過人而存天兮快湔滌其垢濁致淑郵而臻清兮實三聖之階級余惕寤而記異兮勗後來而企及

次愁陽春賦

微雨夜過鳥繞舍而啼春步屨循階何芳草滿眼兮愁人天暄霽兮却雲蕭和煦兮舍新惹岸兮如眠柳共蓋而色鮮滿聽兮涓涓石開竇而下泉蕩漾兮便娟吹野馬而如烟意被惱兮煩冤倚東風兮茫然若乃後宮買賦南冠越吟花迷故國鷺亂上林乍凝睇以延佇悵揮淚而撫心心如春兮無極鬢一夜而霜



雪顧人生非木石兮孰無感於佳節我所思兮幽之  
都隔冰雪兮喚無因彼慘慄之長寒兮豈陽暉之可  
親若春風可卷而吹之兮我欲暖此幽之人

雷賦

夢乘螭以亢浮絕雲霓而起雨紛倏霍而上羽窺玉  
帝之武庫獲介冑之林列輶雷車之軫鞞精憇憇而  
前却跪敷衽而就詰曰茲雷之爲物羗靡臭而靡色  
陽潛結而不洩觸重陰而方激審貞闕而亢鳴渙仁  
蟄而威怪走空中之大聲宜上天之至武長厥逆而  
罔艾昭不饒於野乙隱乃慝而難追故追戮於夷伯

雖聖色而猶變矧備著之不失聞百里而音同疇衆  
邪之逃刑余竦受而起敬仰正氣之爲兵悲魑魅之  
雜糅將以警夫人寔惕寐覺而無見殷猶在於南山  
辭

騎龍辭

余所馴兮浦雲西燁紅鱗兮躍竒牙振風雨兮口齧  
雷掣浮霓兮出高霞小入毫兮大彌極幻億變之不  
測余乃招而馴之兮俛首角而弭伏浴銀浪兮濕滂  
沱刷回颺兮晞紅旭虹棹鞅兮聳霞鞍霧月題兮鑿  
鈴嚴佩裝兮整飭夙飛廉兮亢征公與師之左右兮



陰又爲余先之孔蓋集兮蔭翳衆如粲兮蛾眉萬仙  
童之駢驚兮颺旂常之旖旎歛輕舉兮迅赴肅排間  
徑造乎凌兢峨余髻兮翼余裾漸廣庭兮齊升仰迥  
嗟於玉城兮騰萬班而載興皇申申其詔余勿淫遽  
而逸遊函靈桃而賜之兮衆普飫乎祥休余拜手而  
稱嘉兮遂班師乎舊路筆蜿壇而安驅兮馥猶濕乎  
懷袖

舉颿辭

鼓瑟兮吹笛棹驅兮漁歌春風兮駘蕩花柳兮華奢  
舉芳洲兮宿莽將以遺兮美人美人兮何許隔浦兮

雲烟願手拗兮長風掃雲氣兮入浦涯出白日而照  
之兮遇美人兮道相思浦雲興兮夕風死舉余帆兮  
何所之

七

七覺

玄侗子守口晦文息視含明叛智歸愚背景趨冥灰  
靈塊龜備居偶息澹凝寂而莫開做不華之枯木於  
是白室先生聞而嫁焉乃泝性源蹕文江揚口瀾磨  
舌鋒掉虛舟於學海策神馬於談叢曼足豔立順風  
而呼曰蓋聞睽茲橫目莫靈乎物旣賦其性命又好



其氣質宜秉明而反照合哀榮於在沒詎襍穢以自  
暮竟同歸草木之菸邑今予自賊其天摘垣迷執枉  
已膠矣不可復易吾將爲子剔茅夷蓬割節祛障拔  
疇疇而開聰刮刺膜而逞明出白日於長夜之天生  
青春於幽谷之林奚但伸偃起甓沃焚拯沉而已哉  
吾子其無意於是耶玄侗子曰雖在不敏願承其槩  
先生曰唯唯夫男兒生世貴遂其志是以超塵不羈  
倜倘之士斐英騁雄逸越風軌窮遊酒人達友天子  
爾其腹吞經籍口齧義理射窮百中劔敵萬人勇不  
逃宮黜之目智足解疏屬之懸耻蹈東海義餓西山

於是惟其伸志恣所快意不要曲生果於直死高談  
傾天地大言倒河岳揚眉則八野風霽吐氛則九霄  
虹直示信以刎首著誠以決腹浮雲萬鍾取捨立決  
泰山鴻毛然諾之間於是片言解兩國之紛隻手釋  
重圍之難喜怒則萬乘榮悴縱橫則七雄合散摺胃  
償恩出腸酬怨在齊而燕重入秦則楚危夫然後名  
自立志不違生有益死無悔芳流萬古香播四海光  
有耀於竹帛迹無愧於幽明此固任俠烈丈夫之事  
子豈能從我而行之乎玄侗子曰全生全歸孝子之  
情近於刺客近於盜名非我所師請新其說



先生曰莫顯功名士所慕悅協創共治以安王國是以奇符軒伏妙契風力胃藏六韜頤指萬甲於是龍舉而雲從虎嘯而風答委以制閫之專遇以推轂之隆觀其幢麾殲禍蠹旄戈戎蜿蜚龍蛇掩映日月莘莘縱縱魚鳥脰聒沛艾配黎雷電翕闐喑啞則天地瑟縮叱咤則鬼神辟易爾乃侯風望氛而占星象避牢脫穿而察地絡三令五申鼓耳旗目六花八陣神出鬼沒東征西伐攻無堅敵耻洒仇復國勢盤石功弘績偉勒山圖閣或乃釋耒應聘罷釣登車提釣資元呵手摩濡蓋梅舟楫和鼎濟川柱石棟樑大厦以

安曰雨曰暘而舒慘順軌無飢無寒而財阜民殷於是萬物覩頌二人共貞之慶百工和作君臣相悅之歌其歌曰元首明兮股肱良庶事康兮王道昌今樂萬方于是時也恩滂狝狄澤及喘喙翁以腹謳旒以夜眠山堆萬國之帛庭馴三譯之禽甘露湛粟雨淋仁獸起德牧躋嘉祥迎符休慶杏彰春臺朝暮壽域穹壤比屋可封無爲無象斯亦將相者之能事予豈能從我而圖之乎玄侗子曰不可易言不可力致吾斯未能請新其說

先生曰天畀聰明授我以文龜起龍出亦爲斯人是



玄洲集  
以鴻師碩生授奧傳秘博討遐究包略宇宙鈞深棘  
幽劇玄鉢妙其文則師渾噩祖聳佶出正葩入竒法  
研溫淳而覈雄剛考謹嚴而黜浮誇參之以漢秦潤  
之以騷選高而畢天象卑而盡山澤幽而極鬼神顯  
而殫人物鏗天動地而經緯八極懸河瀉水之不見  
竭揮柔染煤而游刃恢恢有似包丁之手經肯綮而  
騁騁其詩則協風雅合禮樂和韶護憂鈞廣其聲樂  
而平其韻和而壯其調亮而古其操幽而曠工以綴  
其律妙以按其曲放淫泆而閑啟辟啾唧而高遠養  
性靈而陶冶采風化而鍛鍊語纔發而人驚句未成

而鬼泣腸皆錦繡唾則珠玉高哦一場風雨雷電唱  
興酬愁兮愈出愈竒又似春蚕飽葉而吐絲作繭故  
其才藝螟今古名聲聒宇內教以之文國以之華雖  
享富貴於一時孰得失其榮枯此亦文章之巨麗子  
豈能從我而爲之手玄侗子曰文墨之工只一小技  
壯夫不爲請聞其說

先生曰朴日益散世日益叔自蠹其真弱喪蒿目惟  
彼玄虛恬泊以爲其質清靜寬閑以爲其德色味之  
賊絕於口目聲臭之奸斷於鼻耳七竅旣閑混沌不  
死是知絡馬穿牛智機發焉眩僣擔囊巧機出焉作



斗斛權衡則爭盜之機所以兆也開城池甲兵則鬪  
奪之機所以著也欲以亂治只以亂治况蓬蔕難處  
芻狗已陳生地獄今議不入死天囚今良苦辛周也  
蝶也俱是一夢垂臂鼠肝只一盃瓮然則離朱擅視  
而瞽瞍所以失明師曠專聽而聾聵所以失聰堯與  
舜攻仁義而桀紂所以失性曷若壞爾禮樂捨爾忠  
敬息警止察棄智絕聖于于詡詡巔巔顛顛睢睢肝  
肝熙熙恣恣沕於無爲合於自然非人而人非天而  
天於是生不往來死無鬼神清升濁摯反元歸根陶  
以無懷氏之世鑄以葛天氏之民攀巢窺穴而不相

迫麟鳳龜龍今以爲畜斯亦莊老之至道子豈能從  
我而學之乎玄侗子曰異端虛無涉於誕譎亂朱亂  
雅大亂真兮獨不聞鄒賢闢之之說乎

先生曰跳丸莫駐朝露催晞紅顏歛忽白頭無幾寄  
蜉蝣於天地空逝水之悠悠然而服氣導引短者可  
脩順神養性促者可求方其脫塵蛻入道境氣是火  
身是鼎漉金津鍊玉液虛而待之孔神之物做一純  
陽告功三月鑄龍虎而吞吐下笙鶴於白日於是驟  
紫鸞騎白鳳陟玉京降紫洞琪樹瑤花以爲草木丹  
丘赤城以爲室宅截雲霞以爲衣裳吸沆瀣以爲糧



食遂乃邀王母於瑤池辭麟嘶月揖老子於玉關碧  
牛牽風朝賜谷而暮金樞攀北斗而入紫宮載玉女  
而出閭闔招黔羸而相與語闕滄桑之百變視一朝  
以萬古斯亦羽化長生之至道予豈能從我而求之  
乎玄侗子曰仙者荒唐有聞無見矧夜旦之必然詎  
斯人之能幻先生欺余不爲之信也

先生曰西方有人樹道之祖三年祇園一天花雨萬  
象通靈普化無垓爾其法海無津浩洋汨兮情波莫  
測泮盪滴兮浮慈航駕慈筏出清虛入寂滅定凝光  
明涅槃圓覺於是灰三昧斷六根藤纏背鵲巢肩識

淫躬之毀法吊阿難於室羅見他心之默通仰菩提  
於巖隈拯普生於無上之界濟大眾於兜率之大觀  
剝剝於浩劫悟塵塵於大千其爲道也不生不滅不  
燒不溺摩尼迥照冰鏡洞澈肉髻墳頂白毫根睫隻  
履一晒優曇照鉢錫虎謝猛孟龍藏毒符妙契於蓮  
花播法辭於貝葉千梵道偈過盜賊於六穴萬吼獅  
羅叱夜叉於九鎗婆皆菩薩僧盡彌勒舉衆歸法轉  
世一佛輪囷火傳千百億渾世界之極樂是知蛇變  
質而爲師雉幻形而作法旣呈白牛之牟牟又馴狂  
象之圓圓雖微物而亦然况近在乎人情乃有此邪



之杜口摩詰之掩扇體鑿穴之道澄鼻垂涕之顛瓚  
南岳之巔廬山之遠舉靈觀而妙悟咸因地而頓覺  
將流澤於萬世舉摹天而贊日斯亦釋家之至道子  
豈能從我而師之乎玄侗子曰葱嶺之說理近而遠  
亂治亂倫其則不遠梁武事之卒有臺城之亂符秦  
法之無救淝水之患大而喪家國小而失其身况無  
父而無君人孰予而臣之苟先生之不遺姑舍是而  
再思雖然辭氣之間似有激動依違之際不甚蟬竦  
可撼可勵可振拔矣

先生曰原夫无於無始有於太極兩儀既生五行繼  
作萬物之林人乃其一受天明命稟我良性一理統  
之氣與形並四端七情惟理與氣理無不善氣有澆  
淳操存捨亡造次天人是故聖人者立率修之先用  
中于民峻極于天以爲三其綱以爲五其常爲之刑  
政爲之禮樂爲之教爲之法於是一家賴之以有一  
家一國賴之以有一國天下亦然四海亦然天以之  
成地以之平無是食則餒無是道則死食可餒而或  
生詎離道而不斃談未卒玄侗子蹶然而起呀口吐  
舌遂拱束而立曰噫哉言乎美矣至矣無以加矣然  
則是道也何道也願承其詳曰堯得於天傅舜者是



舜得於堯傳禹者此湯文武周以傳夫子夫子之得大成之集經傳由而創立禮樂賴而條列綱常於是乎昭晰亂賊於是乎屏息中國所以尊夷狄所以卑斯人之免禽獸於今日亦豈非夫子之賴之曰然則何修而至於此乎曰其原出天而具於一身其修在已而不由於人藹然一端初非不天物欲所蔽背天歸人然騎驢覓驢之不難信伐柯求柯之不遠故滅人而回天實不外乎自反是知格物致知之功積而至於誠明洒掃應對之節充而至於治平是知德性雖尊存而不問學則近於老禪禪失於空老失於玄

禪者比天曰空而已矣老者比天曰玄而已矣天何教哉天何言哉我空我玄天而已矣嗚呼悲夫彼豈知天之所以爲天者乎馮馮溘溘穆穆之體則乃天之所以尊德性也陰陽升降而四時推移則乃天之教化法令也風雲霜露雨雹之作而舒慘榮枯無不順理則乃天之禮樂刑政也萬物之芸芸生化變易之無窮則乃天之所以道問學而傳之者也然則參天並立而則天無違者獨非吾夫子之道歟於是玄侗子百拜磬折而嘆曰向者先生徒以游俠之事將相之業文章雕篆之技神仙詭誕之術老莊之



虛無釋氏之空寂爭施互設紛費辭說將以悞迷只  
以滋惑及聞聖人賢士體天之道小而修齊其身大  
而平治其國以至雍熙於變之效巍巍蕩蕩之業然  
後褰霧觀日汗出病已如客得歸如夢而寤夕死無  
悔終身誦之從子而行惟子之為

玄洲集卷之十二

玄洲集卷之十三

門人慎天翊 攷

賦續 三十二首

賦集

三十六宮都是春賦

世有支離子弱喪離索摘埴俵俵友無是公處何有  
鄉不達生之理焉窮死之方既未知夫天地又何卜  
於陰陽黔羸氏往而造其廬遂詰之曰夫扶輿憑漢  
大氣舉之物之林林惟理之為挺吹萬以聰明懿莫  
我之為最是故聖人達士配天則地窮玄察極妙觀  
天咫鑑方寸之虛靈究無臭而無聲今吾子塊嘿遐  
外兩忘心目無疑自信有何見識支離子汗容赧面



而對曰賤子倥侗苟充物類朱愚白老禽息鳥視既  
昧人則詎明天咫黔羸氏三讓進而教之曰夫不知  
羲卦交易變易之理則泥於盈虛消長吉凶否泰之  
機泥於盈虛消長吉凶否泰之機則終爲草木土石  
鳥獸之歸矣僕將爲吾子覩縷邵子三十六宮都是  
春之說子不欲聞之乎於是支離子起而問焉曰何  
謂其三十六宮也願承其槩黔羸氏曰諾其爲宮也  
基鴻濛接混茫陶理氣鑄陰陽肇于無極形于太始  
伶倫考曆而卜日風犧視圖而相址以真宰爲匠以  
造化爲鑪豐隆奮椎而鍛冶固祿束蘊而吹噓於是

太虛爲梁素朴爲礎玄牝爲門紫微配位日月星辰  
以爲構櫺風雲霜露以爲牖戶無垠土大木之飾而  
鞏此宇宙無鈎繩削剗之勞而帖妥萬古以無形爲  
丹青色不漫漶以不息爲樞機不蠹不爛爾其占位  
則曰乾曰坤若震坎離相生相長爭設互施爲男爲  
女爲父母之復而始始又復天遠根月遠窟爰舒慘  
庸開闔暄且凄寒又煥繚以周三十六以之而考其  
音律則黃鍾大呂兮無不中以之而卜其序次則子  
丑寅卯兮互爲用叶于五行兮金木水土合于五味  
兮酸辛鹹苦青帝居東兮白帝西祝融玄冥兮南又



北鴻紛博敞混淪磅礴紆餘塊北無垠無壻芸芸戢  
戢叢叢藉藉道無終竟理何所極輪焉與焉兮豉如  
翼如接室連牆兮六六談未卒支離子應聲答曰三  
十六宮則聞之詳矣何爲其都是春也有二儀然後  
五德著而成務有四時然後萬物兆而生化是故春  
而有秋如晝有夜既有其生焉能無死如或有來無  
去同而無異長春不秋無冬無夏則氣不可以爲氣  
理不可以爲理三百六旬兮何用五音六律兮無取  
夏而秋秋而冬冬而又春兮胡爲乎都是春而止哉  
黔羸氏听然而笑揮手止之曰何足下疑之太早也

吾爲足下畢之夫乾行健健以元流行者元不息者  
元生生者元化化者元是以在天曰元在時曰春亨  
與利貞兮雖殊究其用則一元夏與秋冬兮雖異考  
其行則一春是以使之爲利爲貞者卽一元也使之  
爲秋爲冬者卽一春也是知三十六宮兮雖異位去  
去來來兮惟是春彼邵子者說道都是元不足而方  
說都是春云云誰識都是元云云者乃是都是春云  
云也支離子膝席踴躍而前曰豁菴開壘快我瞻聆  
俊狂卽聖悟酌方醒黔羸氏曰猶未也請盡之蓋吾  
子徒聞三十六宮之爲都是春而不知都是春之爲



玄洲集  
都是元徒聞都是春之爲都是元而不知都是元之  
爲都是仁獨不達物我無間而天人一理之說乎曰  
春與元則已有受矣何爲其都是仁也曰人有四端  
仁乃其元惟聖則天順元體仁是故溫良恭儉之雖  
殊究其體則一仁孝悌忠信兮雖異考其性則一仁  
是知四時之周環五行之生克萬物之榮與悴無非  
一春自然條達之良能致知也格物也誠意正心也  
暨夫刑妻御邦之道亦無非一端仁理周洽旁暢而  
有以自彊然則天理如何都是春聖人如何都是仁  
天亦一聖聖是一天天兮人兮一而二焉五帝一仁

三王一仁文武周公兮一仁有如孔聖兮一仁彼日  
一至焉之何論或不違三月則庶幾噫春風邈爾難  
煽兮草木黃落兮江漢回滔滔者天下皆是又何誅  
夫今之人况足下知乾巽坤震之爲異宮而不知流  
暢周達者乃是春知洒掃平天下之爲異節而不知  
泛應曲當者乃是仁是猶騎驢而覓驢何不出戶而  
由道語欲訖支離子磬折而趨百拜而謝曰向者先  
生高談極辯河漢無極湔渺浩沔顛倒恍惚若臨滄  
洋四絕舟筏只識三十六宮之所以爲宮而不知都  
是春之所以爲春逮聞元是春春是仁天與人同一



理之論然後如涉得濟如客得歸廓開迷冑剔霧就  
暉從前牢痼四十九年今夕何夕親炙音塵既承嘉  
誨夕死何悔 又有一首見下純六類

拔劍起舞賦

漢大史公與楚史氏有舊往過楚史而問焉曰昔我  
皇之定天下也天怒湯克夏狂桀百二建三章戈盡  
倒壺爭漿摧枯拉朽捷於影響然而項王何人乃獨  
爲兀辛勤搶攘八年馬上睢水之敗彭城之圍中冑  
之厄置俎之危自始迄終興機敗績靡不採記昭載  
汗竹至若軍霸上宴鴻門之日衆寡之勢懸絕屈大

勇而能怯約婚之計留侯籌之早謝之策項伯謀之  
是用輕騎馳詣出於倉卒庸不成行騎不就列唯良  
噲等一二臣同雖有良史未遑與從故拔劍起舞之  
一事在國史未盡其詳今史氏勿以觸上爲諱又勿  
以成敗論雄姑以當時之見試爲我覩縷史氏曰諾  
敵爲子說始我王擁兵而入也非不知約法之爲仁  
非不知殺降者之爲非義非不知掘驪山之爲虐非  
不知焚阿房之爲暴第以位爲上將軍功又冠三軍  
碎邯鄲百萬如舐糠鋤芸使強秦自滅是誰之力也  
使諸侯膝行又誰之績也豈不能捷徑以疾馳以天



下爲盡在已鹿將焉逃所以徐徐入關則後之柰何  
不量勢力經自先入據關守要反肆拒轍所以投驪  
山焚阿房非怒秦也乃怒漢也矧如降王子嬰者不  
以璽綬出迎而乃與漢謀厥罪難道然則彼以不殺  
降除苛法爲恩於秦而此乃反之者亦不外兵法以  
恩以威相反之術也於是陳兵四十萬次鴻門而耀  
敵嗟一刃與一毛柰鴻殪與秦岳於是鼓駭天旗掩  
月壘雲布士虎列幄幕籠霄地欲狹將軍樹燾天爲  
低是日也佃惶有人草草容儀壁門朝開謁者傅辭  
乃以沛公之意致命于將軍幕府其略曰獲罪臣劉

某請送死于麾下始臣之先入非敢自計一以爲王  
前驅一以爲民除害是用府庫之財不敢自專宮室  
之居不敢自安清達道兮後我后迄于今幾日而况  
金甌一缺羣雄蝟集紛紜覬覦朶頤爭鬪是以閉關  
以儼鎖鑰備他盜也何意之有謹以秦皇帝璽符百  
拜獻於左右方其時也以王之深怒何與項伯之緩  
頰以王之大略何容子房之巧術然王之量鉅而仁  
弘兮弄沛公於掌握領謁者出使招來前于時沛公  
跽伏轅門死息僅延冒威驚趨三跌而顛拜叩庭除  
順王顧指倘有喑啞之一聲幾自斃而不起遂延生



而許平偉大度之叵測鬼神爲之輦呻天地爲之瑟  
縮臣僭爲之聳汗將士爲之脅息爾乃作高會張大  
酒樂動嚶喝西日在岫罰卮飲卒壽禮行畢遂乃命  
沛公起獻舞干席命項莊借其執劍也霜鈦虹直雪  
鏗電閃飛光掣盃散彩翻幕躑躑兮凌亂僭僭兮恍  
惚揮霍兮鴻翥縱橫兮鳳躍持長兮入短耀背兮照  
腋瞻在前兮在後羗北指而西拂縱輕體以迅赴影  
追形兮不及於是舉缺者三有一范增劉郎驅幹楚  
冢性命揮袖裡之青蛇窮沛澤之神龍豈料夫貸畧  
刻之餘息成萬古之英雄縱一朝之殘俘爲八載之

強讎嗚呼苟內欲其必殺豈其舞之秩秩勢已蹙於  
鼎魚又何憚夫鈇鑕其生也其殺也只在於一呼吸  
之間則又何必足之蹈手之舞而後可殺也哉蓋莊  
之舞范之缺皆偶然之發也爲積威之所約滋一時  
之驚惑如或有意於劍舞以遂其機事則以數里辟  
易之怒豈被沮於翼蔽以千人自廢之威豈怯縮於  
裂視第惟我王之意則以爲俱是楚人約爲兄弟豈  
以爭天下之利終至忘一家之義且人旣服其過不  
宜有怒是用釋忿醉飽而還以威以仁若施冬春視  
嬰兒而自如曾不滿乎一眼逮夫龍虎相啖智勇俱



困于戈十載風擲雨沐哀我生靈幾多魚肉茲乃以  
百戰百勝之勇爲兩全兩得之計于以返太公呂后  
使父子而夫婦而後請割鴻溝漢西楚東無非至仁  
無非至公奈之何忘我大義背我大德乘我不戒奄  
逞詭譎用良平姦謀乃曰急擊勿失嗚呼非仁義不  
足非智勇不及倘此時不自決而渡吳江如漢王間  
行趨灞上之舉則今日之天下未可知也然丈夫幸  
免而苟容曾所竊笑於當日誰知語馬童而自刎故  
令羞漢王鴻門潛遁之面至今烏江之風雨應悔鴻  
門之一宴尤可恨者莊之一舞非楚之有意於漢漢

史之失其真以項莊之舞疑項王之心非惑耶於是  
太史公盱衡而笑揮手而止曰史氏之見是則是矣  
雖然成敗之數在天非人故其入關之先非漢自先  
天實先之鴻門之翼蔽非項伯翼蔽天實蔽焉天又  
誰楚於彭城非紀信誰而可免天又勸追於固陵非  
良平勸而迫戰至於德亭長而自刎或天假王手而  
使刎噫天之絕暴而佑仁若觀火而不誣若然則增  
之缺莊之舞終逞其機必止於斬袪與中鈞又何損  
齊晉之爲霸况足下欲掩君過反揚國惡拔驪殺降  
雖出於怒漢而江中之事又誰怒也漢王雖可怒江



中是可忍歟談未卒史氏赧汗百拜謝曰子之筆法  
董狐不如

鳳凰翔于仞賦

鷓與鸞鳩相與笑於榆枋之間曰鯤之南也以運而  
徙鴟之東也以惡而避鷗斯之頻頻兮知所唼鳩鶴  
之踈踈兮知所集是知有羽必翔有翮必息差池海  
乙載頽載頽綿蠻栗留止於丘隅或銜蘆而卽陽乍  
冥冥而避虞或捋茶而趁臘旋啗啗而就屋覩圓方  
者鷓之舉也圖南北者鷗之巨也舉宜漸而宜萃疇  
妄晏而輕植今余所以決起雖槍茲而亦足胡德牧

之反是謾飛峙之異常聞盤嬉於千仞彼且適乎奚  
方於是鸞鳩翼然翔行而進更詰于鷗曰曰惟是垂  
我聞如何其毛如何性又如何啄菴生成栖息如何  
蒙未前聞願承一言鷗應曰唯敬條之惟彼崑崙有  
丘丹穴之山其山也隆崇崩崩岷岷崎嶇峯嶽峯岬  
啞嶒崑崙樹都琪石咸玉彤霞釀彩雲織玄醴滲其  
突靈梧挺其崑几毛之所不乳衆羽之所不郊爰噉  
有觜載麤其翰一雌一雄曰鳳凰只其禽也鈎喙丹  
含長顧星視頂紫勝頸翠鬣呈九苞彰五德所峙惟  
桐所食惟玕其毛則駢駢晶晶燁燁班班五色炫而



離杳衆彩射而歛絕煥乎文章之旖旎燐亂兮吁可  
奇乎駭矚其音則嗚嗚嗚嗚吭吭呶呶鉗鉗琅琅嘒嘒  
齊戛戛八音和而清亮五聲屬而播逸纏乎其韻之  
天眇完轉兮吁亦異乎爽聽既華彩之外斐又仙律  
之中響宜作瑞於人間表靈異於蠢動而况皓鶴非  
祥軒卽寵白鶴非貴籠又榮獸有供奉之官禽有雪  
衣之郎彼庸雛與常鷩舉逞飾而銜枝胡茲羽之遐  
舉遑絕世而高厲觀其翩翩其翼翩翩其翩翩其  
竦翊翊其颺昂其首展其尾拳其爪斂其有遂乃扶  
搖羊角逸越漂疾超埃益而度坳塊拔洪恣而蹕囂

聒騰清霄而軼浮景歷蟻蠓而兀寥廓背負天輪兮  
足換浮雲橫掠椽欒兮翊斗極颺揮電霍兮跨汗漫  
攀薄凌兢兮影滅沒嗟百鷩之厲吻兮舉迷向而失  
波矧一鷩之直上兮豈追響而索迹於是天俄可度  
風斯在下烏鷩不得噪鷩鷩不得味神鷹不得挈霜  
鷩不得攫昆蚊喘喙之類不得逞其味穀果萌芽之  
物不得備其啄虞者弋者張網四面而祝者不得售  
其機括伊也易也割和五味而烹者不得施其鼎俎  
乃有騷麟羽子狎鸞仙父披霞子真蹋雲弄玉或相  
邀乎寒門或相馴乎積石遂長往而不返杳莫拊其



逸躅談未卒鸞鳩曰噫然則是禽也有聞無見有聲  
無形雖同族於羽毛固異質於尋常彼千仞之蒼蒼  
兮夫孰視其翱翔余固知子所云鳳者歸漆園鷦鷯  
之寓言鷦乃嘆然嘆曰謂鳳云者豈其然乎既亂遁  
而治見寧一往而不復是謂仁鳥其竦也德是故翔  
乎攀援之世集于雲鳥之國舉乎人神雜糅之代下  
乎鈞天廣樂之域遁乎茹毛飲血睢睢盱盱之時隳  
乎茅茨土堦熙熙皞皞之日食殍爲糧兮宜棄軒轅  
之俗適駿厥聲兮宜答岐山之嶽故一來與一鳴須  
至德之昌辰彼將聖之爲臣兮猶有憾於無君麟雖

出兮遇獲宜欲鳴而未鳴聖德衰之歌悲應爾鳳之  
側傷由是觀之則雖五百而一見亦希瑞而罕祥曠  
千載寥寥邈邈兮蓋有之我或未聞雖然極否而泰  
道所循環用晦而明乃理之端道不可以終泯理不  
可以終熄矧今剔昏焚芟狂惑屏奸賊列鴻碩素朴  
登奢華黜仁雋需惠霖霖軫句芒完猶狨春羞德海  
讓澤鮒耄歌兮齟齬舞輪萬物於壽域想鸞鷟於千  
仞佇卽臻乎華嶺將一鳴而驚人豈求絕而無聲遂  
作鳳之翬三章其詩曰鳳之翬兮德之瑞兮吁嗟鳳  
兮鳳之尾兮德之至今兮吁嗟鳳兮鳳之鳴兮德之昌



今吁嗟鳳兮詩罷仍咏鳳兮之歌歌曰聖王既逝大道既隱鳳兮鳳兮何翔之遠聖王既作大道既顯鳳兮鳳兮何來之晚仰千仞其無覩但鷗鷺之漫空於是鸞鳩乃翟翟于色翟翟于中茫然若喪蹶然若失曰今我仰而視俛而咏逃於隼匿於弋跳梁乎女桑之顛兮平崩籬之隙奮然鼓翼不越三劫之塔突區迅征未踰十步之庭恒畏首而畏尾戒鷹鷂與狸猩瞻鸛鶴之高翅望鴻鵠之逸翮猶尚竦羨自慚蹇拙及聞先生丹岫彩翼高飛千仞之表覽德翔集之說然後驚猶井蛙之觀海慄如夏虫之見冰塌若病

鷗嘿若癡蠅怵惚然疑莫知所爲

射石虎賦

弓人之子往詰于矢人家曰若知夫決拾之妙乎鏑飛于窮陽烏丸落鏃發於機懸風中裂或三連乎其白或百穿之有葉雖巧造乎玄機亦其術之可學獨怪夫猿臂之老將致飲羽於夜石以言其巧則脆竹之觸石也必折以言其力則尖鋒之貫石也無術以爲真也鬼神之所不及以爲僞也太史之所昭載雖造化猶有所憾夫人力豈至此乎廣是何人所爲如何蒙竊然疑莫析詳訛盍爲聾瞽粗叙終始矢人



日唯敬爲子說惟漢三世道亢治聳散隴蜀之間氣  
得將相之有種於是惟熊瑞夢苦縣仙姓結髮屠中  
九扛其鼎爾其頭輪焜目電睽宛其脊駢其脅曾四  
海身十尺書雕垂兮劍一人非余志之所欲爰支左  
屈右而彈射云余學乎逢蒙之妙術慨莫逮乎高帝  
有文皇之歎惜際孝武之好大技行間而樹大燾西  
衝北突兮弓搭伊吾腦沙髓積兮羗棘骨暴或解鞍  
閑眠而奪胡氣或伴死起絡兮禡胡鬼漠南北兮王  
庭絕陰飈息兮殺氣寒血洗箭兮青海灣歌鼓競兮  
玉門關功可論兮蓋天下侯萬戶兮乃數竒於是釋

虎符解魚麗秋蓮匣綠沉澁龍旌卷兮獸鼓死甲鱗  
謝兮鳴螺息當時百戰之勇今日蓬蒿之人平生四  
方之志蕪沒桑梓之間東陵秋早時賣故侯之菰瀾  
岸皆歸寧免醉尉之訶噓紆軫兮吐鬱屈橫宛虹兮  
千尺何舊日之飛將今宜爲此落莫速乎跳梁報警  
宵旰煎惕皇推公轂北平砥節於是威風遐煽草樹  
黃落狼烽晝霽虎坼宵譚轅門告暇士歌騎騰時霜  
霰之刻轢際天侯之陰凝將軍於是憑堅利以縱獠  
順玄沍以效殺乃左烏號右魚服撚霜鋒擗雪鍔蹕  
平唐兮逐奔越嵌巖兮犇縮竭鷹鷂於翳會齧研縱



於巢窟弦不虛控兮先中命處洞宵達腋兮他他籍  
籍方拗怒而罷獵馬猶踈於餘足衝猛噬而賈勇值  
歸途之昏黑于時林中有獸兇耶羆耶披草而伏如  
虎而疑遠而望之形奮豐而躡蹊近而曠之狀挈攫  
而躩踞秘眈瞰之猙睜露陸離之文脊翳白額於幽  
蔚闖戟牙於奧薄似眠飢而臥蹊若偵熾而當谷猶  
負嶠而厲吻如卽禽而反睥疑助嘯而風答况潤斑  
而霧濕非塗山之化石諒牛哀之成驥馬踟顧而不  
前人喘汗而莫進是探穴而編鬚吁可畏乎駭矚於  
是將軍抽流星引明月鈎強弦載勁竹目已注於心

繫指豈破而虛發閃飛電兮樾構霹靂驚兮山魘倒  
纔離控而應彈已沒鏃於腸竅何百獸震恐之威逢  
一箭而奄斃噫旣死而留皮宜可寢而可處遂乃前  
而察之手而摩之則非毛之班乃姿之砒非皮之鞣  
乃質之確何狺猛之豹變幻山骨之堅頑無外威之  
狐假有雲根之噴吼未疇昔之所射者嶄巖之半腹  
談未卒弓人曰异哉何爲其然也謂虎然也虎難化  
石謂石然也石難飲鏃况虎可搏兮不可狎兮石可  
轉也不可貫也誠猶可通力不可強鬼耶人耶惚兮  
况兮孰使然哉不可惻兮且吾聞之射不主皮所求



者鵠中必決眦非獸則禽是知更羸虛彈孽鴈先落  
由基未發玄猿豫哭鷄而不死平公之弱也兕而猶  
殪唐叔之力也彼用力之巧拙舉企及於毛血惟射  
石之一事誠未聞乎千億荀子言之不文豈史氏之  
難信矢人曰吁豈其然乎爲子盡之夫心專則誠一  
誠一則神通物無微而不形形靡堅而不齧是故彼  
夜歸射石而能貫雖廣也亦不自必當持疑心動而  
目矍見其虎未見其石此所以懼專於誠誠專於衷  
衷專於手手專於弓弓專於矢矢專於虎矢旣由於  
精誠石亦忘其堅固然則非矢之發乃誠之激非石

之融乃誠之徹非矢射石誠卽射石非矢貫石誠卽  
貫石彼用誠於造次尚通金而貫石况至誠之無息  
無所往而不極推是觀之猛於虎者可擾逼也堅於  
石者可穿鑿也天地也日月也猶可感而可貫則矧  
近在乎昆虫木石也哉嗟乎將軍之矢有迹之誠也  
君子之誠無迹之矢也只知有迹之矢貫頑石之爲  
竒而不知無迹之矢能一貫於大道則豈不爲流俗  
慨也獨惜乎廣之寸誠能徹半夜之頑石廣之衷曲  
不能達元帥之戎幕身未致於侯王竟齒劔而自戮  
千載英雄之景慕幾多回腸而淚臆語訖兮人乃離



席拜稽謝曰今我業工於弓責妙於矢彼射石而石  
開謂可學而能是及聞君子誠一之喻渙然冰釋廓  
然病愈蒙雖不敏請事斯語

筆諫賦

子墨客卿問於翰林主人曰若知夫諫君之道乎天  
蓋高縱難測兮有寸誠可以固矣龍爲臣可擾狎兮  
批尺鱗必至死是以得其道者則君格而國以昌失  
其道者則身誅而國隨亡此所以韓非作說難戒盡  
言於游士蘇公著諫論勉忠告之以智噫不可無是  
諫亦不可遽是諫主人曰然史取諤諤易貴審審固

正言在不諱兮奚暇舍容而俯仰客卿曰否梅伯爲  
醜兮無奈暴君之革命比干受剖兮何益淫主之亡  
國故以幾以諷之有道兮其爲諫也不一主人曰然  
則何如斯可謂得幾諷之道乎容卿曰唐有柳子憲  
后攸臣其諫也筆憲所格焉不喻道而喻筆偉茲諫  
之可法主人曰願承其槩曰唯唯柳公之筆希代之  
迹巧合玄關一天雨粟妙符神機滿紙風雷金繩鐵  
畫蛇走龍囿玉索銀鈎鬼泣神驚張草李八不足比  
兮王毫鍾墨兮莫與京宜爲世法乃動帝目故其副  
愛州未爪而催召自公虛座近密寵以翰林盛以玉



堂每進書糜美未央鳳閣焚草數幅短章龍顏含笑一唱三歎忽一日天子乃廷召面陳曰看卿筆法見聞所罕行行骨力字字精神曲得規度工造真元意匠慘憺兮巧刮造化之窟神馬恍惚兮細入秋毫之末蓋鬼神之或助豈人力之所及何由而至於此乎始爲朕略陳其術於是柳子乃拜手稽首進曰臣請爲陛下敬喻用筆之道夫心者君也一身之天君手者臣也一身之良臣筆毫者夫奴字畫者政事是知出令者君也行君令致失奴者臣耳君不出令則雖有臣不得自專臣不致令則雖有奴不得自先政

何由成國不能國然則心與手謀手與筆合畫縱點橫字排行直豈非言以盡心文以盡言言固是心文固是言所以有紛萬事一心之原心正則手正手正則筆正心不正則手不正手不正則筆不正行不成行字不成字毫釐千里一操舍際是故其操筆也非操筆也乃操心也其秉筆也非秉筆也乃秉心也于以染之揮之兮無不中規于以摸之寫之兮各得其宜於是一心正一畫正一畫正一字正一字二字千萬字兮無不一出於正一行二行千萬行兮亦無不一合乎正然則右軍之寫道經也心在博白鵝則其



字不正安石之寫隣也心在於索高價則其字不正故古之持是筆者莫不反心而求正心爲表筆爲影兮表端而形無不直心爲響筆爲應兮響速則應無不急乃知聖人之書兮聖人之心也小人之書兮小人之心也以書求心心焉度哉以心求人人焉度哉故彼八卦九疇具萬理兮乃羲禹體天生物之心也誅奸諛於旣死發潛德之幽光者乃孔聖好善惡惡之心也惟聖克念小心援筆惟狂罔念肆意放筆念茲在茲非筆惟心毋怠毋忽非筆惟心噫小而言家則家長爲心大而言國則國君爲心故家長旣正

一家卽正國君旣正一國卽正董子曰心和則氣和氣和則形和而天下四方無不一以和夫如是則豈獨責一物之不和臣亦云心正則氣正氣正則形正而天下萬物無不一以正夫如是則豈獨責一筆之不正言未卒天子乃改容歛衽嘉乃頌言黜爾邪萌就爾正源吁當此時也陽城之詆延冷雖曰直矣而未免忠州之貶謫韓公之論佛骨雖曰忠矣而未免潮陽之遠落未迴日月之光返遭雷霆之怒忠見尤今直黜世滔滔而接武孰若斯人以筆以諫故善諫者不以言爲諫而以物爲諫吾固知陽韓勤懇於章



奏反不如喻筆之一諫嗚呼用裴度用元衡之時則  
心既正筆亦正字無不正用程异用甫鑄之時則心  
不正筆不正字皆不正推憲宗十五載之筆迹驗憲  
宗十五載之操捨難罔者心也難欺者筆也懿斯人  
之筆諫誠萬古之特筆主人謹應之曰人孰無筆吾  
取爾之直筆人孰無諫吾取爾之諷諫語未訖頴以  
秃辭西狩獲麟客卿告退主人默然

穗書賦

子墨客卿問於翰林主人曰鶴以爪印虫以蹄畫脩  
蛇無足短蚓有迹紛變化之如雲或天感而鬼格獨

怪夫神農之起畫手瑞穗而取則民以粒而以織豈  
此書之有賴主人曰敬爲吾客粗叙玄始粵自圓升  
方結二大生朴巢肝燧唯五克晦質舉息禽而視鳥  
競歸獸以茹血然厥理之孔昭豈終泯於橫目帝瑟  
縮而默顰眷牛元而御極於是續驪圖紹龍師嘗草  
濟天鞭木若時有無爲市日昃而虛糝斷爲農野鋤  
宮居爰裘褐於寒暑乃渴飲而飢食反良知於恫憫  
藹天人之沕合是知大道不可以終晦斯文不可以  
遂滅諒天視之自我允產祥而符德茲命物而詔聖  
茁羊頭之嘉穀紛撐畦而柱原敷八穗以郁郁猗歟



盛哉既豐既實休歟美哉既茂既碩於是耄艾歌咏  
載欣載奔以芟以刈獻帝之門帝曰欽哉嗟我元元  
天其眷予予敢不承遂乃觀其條暢察其敷榮則一  
莖寃延狀金繩而鐵索入歧紆餘宛蛇蟠而蛟結于  
時謀石馮心詰穎免冠信手縱橫隨意揮旋行行疎  
密摸懷穰也字字盤屈體秧秧也效豐穗之蕤蕤做  
嘉禾之濯濯巧刮造化之窟細入秋毫之末掃一場  
之雷電驚半空之風雨遂下令于民曰今此有穗天  
實予佑用此以書開爾昏惑以書以令宜字宜畫惟  
明爾農力爾之穡而况夫壯不田爾口何食婦長無

織爾體何裳助哉蚩蚩務爾農桑於是無田不甫有  
稼如雲我有衣表帝何我溫我有困廩帝何我足熙  
如皞如何帝之力素哉朴哉于胥樂兮此乃神農之  
教其民而穗書之所以作也逖哉邈乎不可尚已談  
未卒墨卿乃曼足呀口蹶然而起主人曰未既也願  
爲客畢之惟籀與篆斗與隸也崩雲之狀垂露之態  
八分十體黝黝茫昧雖爭設而互施只眩目而駭視  
既無益於生息又何補於教化徒勞精而費神謾襲  
訛而承謬故斯民之分四儘去農而歸士既神農之  
世遠宜雨粟而鬼泣偉炎代之有書誠萬古之民則



然則是書也以穗爲書以書爲穗非書而書非穗而穗士而爲農其農也士農而爲士其士也穗嗚呼莫逮遠矣羲農遂爲之資曰天與其德穗與其聖穗以爲書勸斯萬姓穗哉書哉聖帝之慶聖帝有慶兆民賴之非羲非農我安適歸於是主人談訖墨卿告退一堂圖書千載與嚼

河圖賦

玄寰黃摯方與圓匹剛柔相盪以生以息儘恣恣而自暮競歸獸而罔覺帝瑟縮而默詔有牛元之神伏宜或躍之瑞河表聖后之靈德聖欽若而授受龍聽

天而圖降圖何爲乎寵聖聖於是乎俯仰爾其根陰陽體霄壤則帝衷幻神契甚芒而的示昭於昧其爲圖也非縑素非丹牘非山川非土物無爻無畫有點有綴左奇右偶老九少七立四爲體孕五於腹包兩儀於數點備萬理於寸目放彌六合卷藏於密兮摠厥數有三五於是途分黃赤辨雄烏與雌兔極察南北識挹斗與揚箕驗昧暘於坤倪地道並規占休咎於民彝人理並舉以之窮天以之盡地以之醒一世以之蘇萬祀然後人爲人物爲物家能家國能國君君臣臣父子夫婦以華以夷以今以古是知觀天象



而創易得此而權尋鳥迹而做字賴此之存儼皮結  
姻者取陰陽之有度犧牲充庖者示饗祀之有義于  
時變厖爲淳代繩而墨顛顛者以皦皦昧昧者而郁  
郁是故二帝得之得爲二帝三后得之得爲三后磨  
不磷兮涅不礪出無窮兮入無極是造物之無盡藏  
兮視無端兮用不竭偉旣靈而且神先洛龜而兆朕  
此所以天誘其衷惟德是眷地不愛寶惟祥是產雖  
十年而九水不能溺其軌躅雖八載而七旱不能涸  
其至澤天下可竊此圖難竊九鼎可毀此圖難毀先  
天地兮後天地符萬聖而不惑雖三精磨滅而漸盡

今亦此理之難熄嗚呼旣生是聖又出是圖圖以聖  
著聖以圖師非聖非圖吾何取則雖然圖之爲物爲  
聖人出者也聖出圖出如響之答胡聖有迭作而圖  
有出不出際蒼籙之欲季有將聖之大作宜嘉祥之  
協應表斯文之彬郁天不欲乎平治兮故發嘆於不  
出然豈河之無圖奈西狩之有獲迄于今蓋千載兮  
但河水之瀰瀰撫遺圖於陳編起悲歌而永思歌曰  
圖之出兮道之顯圖之伏兮道之隱旣顯而隱胡隱  
不顯聖徂神逝我無適歸圖乎圖乎吾已矣夫

曳尾龜賦



莫神蜿蜿躍天潛淵莫瑞噉噉息梧翔雲之二重也  
知所止焉有夫兮玄衣胡爲乎泥中曳六一而運五  
渾青泥而西東困有甚於甲子誰云爾之太靈爾其  
著神詩書載靈羲經德尚乎物位長乎甲吸道之腴  
運氣而息司太陰而爲寒處溟渤者名穹神無徵而  
不炳智何玄而莫通宜乎處乎深潭避龍伯之釣餌  
出乎清洛表聖王之文思而况大海東邊久絕巨緡  
之客太華峰頭非乏如船之葉今茲泥之淖淖何自  
苦其如此惟彼麟之在藪虞者之喜龍而處陸蟻軼  
而侮爾曳雖樂爾尾之汚龜乎龜乎爾生良苦於是

龜聞太息請對以臆曰我玄蹤國於山澤性是不羈  
愛此閑寂非不知藏文於深奧非不知呈瑞於人寰  
北海雖迥懼後車之載還南山雖遠柰捷徑於要津  
况一落於漁人將夏鼈而共箸顧出矐之無計爭毀  
積之相戒生不免於支牀死何補於納廟神雖王而  
罔活智雖成而反囚于斯時也衣之以文繡共之以  
天球華屋九鑰錦櫝十襲至若師期將啓國疑罔决  
胎璽纔畢神與之協其吉與凶兆告爾卜以敗以成  
靈雖莫測以鑽以灼哀我軀殼與其藏於廟社孰若  
逸於江湖與其死而鑽灼孰若生而泥塗何况泥之



溷溷何與於我塗之濁濁何有於我彼以外汚吾以  
內潔內潔故不染外汚故易滌吾首之矯矯兮觸溷  
溷而無屈吾尾之曳曳兮遵濁濁而無傷然則尾之  
汚兮浴可滌殼之鑽兮安可活泥之汚兮汚不惡尾  
之曳兮樂無極彼處廟服鮮而御潔兮寧易此泥塗  
之樂哉且子獨不聞乎高步易躓厚味腊毒神憎名  
大鬼瞰室赫位極人臣兮俱五刑何似山東父老生  
糲食祿食萬鍾而烹死五鼎何似生垂席門饜糠粃  
故顏氏之庶幾處陋巷而亦樂言訖奮尾舉足而逝  
噫小子之狂簡兮微斯龜與誰爲則誦寓言於南萃

卜行藏於今日

黃龍負舟賦

吞乾 飽風一葉江神送颿聖后攸涉忽銀屋之  
中沸兮悒黃鱗之負鷁烘千電兮焚海激萬雷兮崩  
岳付顛沉於須臾奪舟中之竟龜聖不變而蠲視龍  
乃格而遁匿方其胼胝八載績艾不績三呱三過不  
家於國開窄窄而殺淙疏嚙噬而分洪豎截薛而下  
瀨刊崑崙以走瀧得應龍以劈峻鎮巫祈以杜孽竟  
風沙之茫然民下巢而火粒雲旣土而夢又乃海四  
而州九爰騰傾而赴勢亘萬里之回互旣略旣夷貢



玄洲集  
匪以土壤白黑赤田上中下於是舟航入極輪鬣四  
野有行卽屈何往不通遂乃卜晴晝侯長風理高楫  
橫大江波盡伏濤不揚榜人唱海童藏陽侯河伯之  
屬奔走以鞦韆兮乾端坤倪兮靈暄晴方利行乎四  
方快雲帆之高張倏戕風之暴起致駭浪之蕩滴迨  
中江而未濟勢摧檣而墜楫夫何放菹之餘虫乃於  
焉而肆毒黃其身兮赤其目露牙角之千尺劈層瀾  
以躩踞背孤舟而出沒風雲九萬霹靂一穴舟中聖  
人波底乖龍彼帽黃而戴黔盡膽掉而股慄然大聖  
之莫惻視喘蠖而不色况生寄而死歸肯爾虫之端

怯龍聞言而觀色識大禹之在是爰赧德而怛威乃  
俛首而低尾因忽不見神耶鬼耶何所爲而來何所  
見而逝耶忽來倏往靈怪矣哉嗚呼禹如天龍如神  
天使神神聽天禹可使龍龍豈禹侮禹可懼龍龍豈  
禹懼然則是龍也伏禹神薰禹德驚禹靈淪禹澤畏  
禹變化怵禹不測故奔走以警蹕護木道以翔翔呵  
罔象兮喝馬銜叱鯨鯢兮逐鵬鯨其背負以服役遏  
羣妖而莫呈將駕越而奮迅者嵩師之鵝戛然舟人  
之汝懼聖爲人而不悅龍體禹而卽逝諒進退之唯  
命噫乎茲虫之至靈孰若斯人之至聖是知龍之所



能者雨也澤也而所不能者疏導龍之所善者雷也  
電也而所不善者拯濟無龍則旱一世無禹則溺萬  
古無龍則雨師雷公兮猶可理陰陽無禹則天不天  
地不地人不人而龍不龍此禹之所以爲龍懼而龍  
不能懼禹色而動禹中也偉濟江之不變與大麓之  
不迷允執厥而相傳先後聖之一規頌曰蜿蜿黃龍  
鬻刺天兮巍巍玄聖德齊天兮龍之來兮聖使然龍  
之逝兮聖使然不神而神非天而天無以議爲微禹  
吾魚

蓋車有絕足賦

鳥途懸霄兮石齒齒獲狄莫攀兮人上慄玄熊赤豹  
兮足繭而喉喘兮過雨行雲兮愁半腹彼誰驅車兮  
車載蓋鞭不前兮車欲覆嗟爾馬胡爲來哉玄雖黃  
兮足則絕世皆貴肥而賤瘦兮疇取爾之權奇孕房  
精於渥洼兮曾父龍而母螭四碧玉兮雙批竹瞳生  
稜兮鏡新磨喜鵲厲兮怒人立螺尾麟身兮斑五花  
盪齒至兮辭冀野謂崇丘其黃金胡不登乎天閑兮  
反賈豎焉相尋賈乃牽爾而爲驟兮其車也不糞則  
蓋賈旣輕爾而重利兮之東北忽又西南其載也積  
至斗其驅也鞭又筴皮乾毛暗兮烏啄瘡三山露骨



今四蹄落德兩耳兮牛垂負一息兮魚沫吳之蓋兮  
蜀之途去苦遲兮來不速食不飽兮力不瞻移一步  
兮三四蹶叱驚鬼兮鞭劈雷踟不前兮汗滴滴何昔  
日之龍孫反蹇驢之不若哀時命不相謀兮涕方瞳  
兮如泣余乃攀轅而邁道兮爲駿骨而一哭爾馬也  
胡爲來哉吁嗟乎至於此極哀之命不哀亦命兮遇  
也時時不可必嗚呼自其遇者而言之則買死骨金  
且五百自其不遇者而言之則却千里日行百里自  
其時者而言則駑駘尚蒙錦繡自其不時者而言則  
麒麟亦獲於郊藪蓋自古而猶然固遇時之非偶是

知魯犢未辨兮等者喪家狗周熊未卜兮只一屠牛  
坦逮鷹揚鳳歌於當世而後方識追風滅影之與跛  
驢病穎而懸遠噫重重之蓋豈知爾之爲駿小歌  
曰世有伯樂兮駿昇天衢世無伯樂兮駿困蓋車不  
是無是馬只是無是人其真無是馬耶其真無是人  
耶人兮馬兮柰何乎天歌未竟忽風雲兮又霹靂馬  
龍逝乎玄間余始知神駿之變化兮終不爲蓋車中  
物彼媚聖嫉賢之世人兮又何異蓋夫之失色

鵲巢賦

有樹蒼鬱兮枝相樛黃葛女蘿兮縷絡之上乏鷹鷂



之覬覦兮下絕蛇虺之朶頤擇高枝之扶疎怪維鵲  
之有巢人匠尚拙於經營爾禽也何以家爲昔爾之  
聿來胥宇幾勞殷斯而勤斯雄曰嗟爾雌兮我是急  
於求棲旣綿蠻而止隅又差池而舍泥蚓處堙而神  
王兔營窟而炳幾曰余未有室家獨繞樹三匝兮無  
依雌曰嗟爾雄兮盍求棲而依歸彼蠢蠢之微禽舉  
有巢而卵育寧效拙於鳩婦任風飡而露宿雄爰唱  
兮雌和卜茲樹而開基遂乃雄飛雌集雌去雄隨旣  
啄旣踏唼舍足提來而又去一枝二枝朝而又暮一  
日二日雄曰何之南有樛木雌曰何之鬱彼北林何

茶不將有枝皆舍踟躕兮原隰予予兮叢薄手胝兮  
口瘡上構兮下結日出啞啞念風雨之飄撓日入疆  
疆悶桑杜之未饒拋梁上兮旣鞏開戶牖兮南通迨  
皇天之未陰乃綢繆而訖功偉斯翼而斯棘信攸除  
而攸去於是雄曰雌乎入此室處雌曰雄乎與子同  
夢爰居爰處賴此梁棟乃刷乃翹依此詹楹卵而啄  
菹乳哺翔鳴遂相與賀曰卑枝成屋異工部之避賊  
構木爲巢如有巢之樂國低不打頭於斯焉足以令  
居廣可容膝於我乎亦云渠渠不日成之誰謂予無  
家羽翼已成誰謂爾無子遂賀畢而戒其子曰今此



玄洲集  
作巢余所創始構之非難創之惟難創之非難守之  
惟難昂哉肯構無忝爾生雨雪攸避念我經營卯育  
所安念我勞苦不慎爾守鴟鵂是保不密爾守維鳩  
是奪念哉念哉宴安鴟毒余乃聞而感之作箴而書  
諸紳其箴曰人則君鳥則鵲小則巢大則國

臨河歎賦

莫我知知我者天兮夫豈不可爲而爲之舊余棲棲  
兮南北東又余車兮西馳河之水兮色幽幽胡發嘆  
乎未濟深莫乘兮淺莫涉我如濟兮不可悔曰余十  
有五而志學兮慨文武之已逝然天之未喪斯文兮

焉能繫而不食故吾之席未暇暖兮之蔡之楚之齊  
兮不可羶羊石斲兮惟怪之欲聞噫世主無足爲者  
匡之畏兮宋之圍其於予何飢於陳兮困於衛道不  
爲瑕然不可必天下而棄之兮雖公山中牟兮欲往  
爰翩翩兮將指趙念西路之羗未纔到河而問津兮  
蹇將涉兮未涉聞淫戮之及賢短趙孟之喪德遂臨  
河而愕旋浩余歎兮踟躕嘆曰鳳高噉於千仞兮覽  
德輝而下之鴻又飛兮冥冥非弋人之所纂胡爲乎  
遑遑欲何之嗟小子之狂簡重爲之歎曰將涉淺兮  
石齒如戟將乘深兮龍鬣雷拂石可闔乎傷我足龍



可批乎隳我楫石與龍皆河懼兮二三子盍歸乎來  
嗚呼河不出圖時不來歟狩而獲麟命之衰歟將行  
也命將廢也亦命欲濟者命不濟者亦命天既縱乎  
將聖又何命之埋阨雖然以過化存神之德值未欲  
平治之日夫子之不遇時非夫子之不幸而實時君  
不能用之不幸也又非不得於時君之爲不幸而實  
時君不得於夫子之爲不幸也天不窮於夫子而天  
實窮於時君天不薄於夫子而天實薄於時君是知  
夫子之得邦家者齊不齊魯不魯秦楚不爲秦楚故  
景公之不封以尼谿則非晏嬰止之而天實使止之

定公之女樂以亂政則非季桓受之而天實使受之  
逮不用遺言之康子暨止封書社之子西咸皆天誘  
非所自沮然則簡子之殺鳴犢舜華者庸詎知天使  
殺而殺之也噫噫夫子之不濟河兮獨不爲夫子惜  
而重爲趙簡深惜也

春郊牧牛圖賦

郊如掌草似茵中一川左右山濃霞破兮浮未高暎  
上岑兮鷓鴣鳴彼誰子髮黃而衣青兮睡牛背兮過  
橋行驅且行兮齧復飲管一郊之春色家何在兮問  
不言杳墟里兮深谷皤皤露頂兮植杖南畝者是渠



家之乃翁嗟爾牛既朴而既茁兮一生苦樂兮唯爾  
童牟然吼角戢而耳濕紛滿脰之黃鍾朝牽出兮暮  
驅入幾山南又水北勞爾之日牧而又牧兮之原隰  
忽又阡陌何所獨無芳草更胡爲兮西郊方其隴雲  
潑墨夜雨深兮一犁朝光吐燉霧五里而十里王孫  
遊兮去無來自春色兮滿芳沚爾乃叱上堤鞭入烟  
澗吟度隴眠晴褊袒雨笠蓑黃昏笛夕陽笳時逐  
隊兮隔溪呼又斜風兮三兩歌然則是童也人來問  
酒家遙指杏花村者耶夜深叩角歌重到葛洪川者  
耶共羊來日之夕耶見客拜風雨惡耶厭過堂下者

耶喜放桃野者耶前山雨後山晴不脫蓑衣臥月明  
者耶於是童呼不應兮牛不訛非疇昔所見於青蕪  
余乃近而摩峯兮乃知龍眠之所摸余亦有牛兮服  
田而服箱兮渴無水飲兮飢不芻蹄穿領蒼兮瘦到  
骨朝鞭暮笈兮呵又叱安得牽之入此圖兮向豐草  
兮共爾牧牧童兮牧童兮使我手撫兮空歎息

守歲賦

甲辰之歲臘月告晦客自外至二與三會遂促我以  
燈坐我以堂列我以雕机倒我以芳觴少焉談倦意  
怠如有不樂隱几頽睡謹謝客客有出位者執酌進



日歲律云暮日月其除日之夕矣夜如何其今夕何  
夕除夕之夕此酒此日可嘗可惜今者不樂奈明何  
明朝者鏡柰老何老哉老哉老且死死不復生哀此  
世此所以將聖在川嘆一逝而莫留英雄寄公悲歲  
月之如流况吾與子俱是弱喪胃難去茅面猶有墻  
曾日月之幾何奄視茫而髮蒼生無成兮何事業負  
頭上之崢嶸是用崇酒載肴踏子之門雖分陰而當  
惜况歲華之將殘者今霄之雙鬢又明朝之一年矧  
一老與一少判曉夜於今昔倘一場之甘眠已擲梭  
之難及寧渴睡於半餉昧昨少而今暮今余所以無

寐懼余守之未固是知今宵未盡是今年明朝旋至  
卽明年冬隨皆舊春逐朝新甲從宵窮乙與朝始胡  
爲 睡負此隙駟談未卒余卽斂衽謝曰夫陰陽舒  
慘四序迭迎理氣回薄萬物枯榮推原反本均賦同  
天固無彼而無我胡妄私而妄專偶然爲人何足以  
喜忽然爲鬼何足以懼歟徃忽來寧有窮已然則生  
老者形化病死者氣化以其化者而言則一日之內  
千百化而有餘以其不化者而言則千萬世爲一朝  
而天地與我終始噫造化勞我以生今旣無喜又何  
悲且客徒知守其歲不知守其命徒知寤其寐不知



寤其性何爲其然也苟守而不寤者則雖日守而不  
足苟寤而不衰者則雖日寤而不給彼高高之流光  
與堂堂之飛翬非汝守而可留非汝寤而可駐則庸  
知客之守與寤者終不能守而寤庸知吾之不守與  
不寤者乃固守而深寤也哉客於是呿口吐舌不辭  
而往我對如雷日高三丈

赤壁賦

歲庚申時九月後重陽先望日先生與客舟游石壁  
于時驟雨旋止狂飈忽息水清若空纖纒初濯刺鏡  
面而遐邇覽形勢之紆直執卮酒以相醕流左右而

遊目紛錦累而繡堆杳霞連而霧屬遠而望之兮樓  
龍鱗之照爛近而察之兮驚虎豹之藏躄離山骨之  
戍削兮琢雲根以頽壘况如女媧之所鍊兮塞天竇  
而餘素質又如大禹之所鑿兮决龍門而河道闢若  
非鬼運而神輸兮疇克岸委而崖積翠疑長鯨之曝  
鬣兮白訝防風之朽骨夫何造化之神權兮幻至奇  
以無迹於是先生執酌流眄嘆然長歎曰厥初開張  
孰主張是其始芒芒我昧斯理若以設此者爲有意  
於固國峻函漢方兮無柰秦楚之亡若以設此者爲  
無意於固國胡然周遭兮屹若長城與巨防况箕檀



玄洲集  
至於濟麗兮孰有恃此以威敵細先朝蚩子之充斥  
兮慘王師望風而魚肉至今江波之嗚咽兮想冤悲  
而鬼泣天之設此抑何意歟客有出位者應聲答曰  
以余所料似非偶耳今者昧朝木道將啓天乃晦冥  
大雨以風倒海翻山混混濛濛江南下碇陸旅止轄  
船于此地神所難卜然而先生猶且怡然不以爲惑  
回風止雨如叱老僕爰開爰霽曾不瞬息旣申之以  
晴景又重之以明月秋江淨兮如練壁色露兮無隔  
榜人喜兮棹謳發芳酒御兮嘉蔬錯江如出兮水神  
嬉巢鵲起兮潛蛟躍豈非神明之默佑快先生之清

賞俾揮毫而擣藻摸勝區之景象答造化於千古有  
今日之高躅是知先乎蘇子幾千年兮無是作於赤  
壁後乎蘇子幾千年兮亦無作於赤壁然則天之創  
赤壁非爲吳蜀也爲蘇子也安知今之有石壁非爲  
歷代固國而威敵只爲先生一言而設也言未旣先  
生乃揮手止之微笑不答俛然放筆如有慚色

反赤壁賦

壬戌之秋余在商邑如有不豫臥吟村榻客有自外  
者勸余持酒浮舟于洛曰今茲歲紀屬于壬戌秋之  
旣望又值此月此非蘇仙游赤壁之夕歟是用騷林



墨壇好事之徒莫不提壺挈榼爭泛江湖者蓋以是月與日歲常有焉難遇者年百歲忽然佳期易還特不可失盍從我而游洛踵前脩之奇躅余乃听然露矧應聲而笑曰嚮者蘇子之遊初非擇年於今歲又非卜夜乎今日又非選勝於赤壁又非倍興於此夕偶然作賦於前後便成勝迹於千億苟有蘇子之名之大又有蘇子之才之逸雖非今歲之歲雖非今月之日雖非赤壁之游隨所遊之勝迹今者既無蘇子之大名又無蘇子之逸才徒務襲其年月欲踵美而追懷雖使載酒百瓮鼓吹十行浮萬斛之舟建千尺

之檣乘滿空之風張蔽海之席出蒼梧而浮孟渚掠渤澥而漂碣石歷桑若兮尋蓬瀛舞清飈兮歌素月苟無蘇子之所賦等井蛙之自多迹雖勝而且奇人孰聞而知耶今客不反其本徒欲逐末客之好名不幾惑歟而况以赤壁之游揣蘇子之迹欲以記勝只露其肥既無取乎蘇子又何慕乎赤壁嘗念中流翫景出於自然吊古興懷亦所必然何自哀其短生漫託羨於江水爰一哀而一寬近婦人而女子况乎清風自風明月自月江自江兮山自山蘇自蘇兮客自客又何必取之而用之兮爲自家之翫物是知區區



於死生之際屑屑於取舍之間此余所以哀蘇子之  
阨而並與赤壁而爲阨者焉耳余方以大氣爲舟以  
至理爲楫以黔羸爲篙工以造化爲賓客刺乎萍沆  
之口涉乎混茫之洋敝敝橫鶩乎寂寞之濱汎汎中  
流乎無何有之鄉將落帆於大道之窟且下碇於玄  
札之門奚暇與客游洛之濱况風利不得泊也謹謝  
客客於是憮然失色逡巡避處乃逸而遁杳不知所

蟪蛄賦

小而無內小之至也無內與外無之謂也疇至察於  
無中強名之曰蟪蛄考厥族於漆園怪造化之勞精

受天明命寓於林叢無於有內有於無中處於有無  
之間逸於名實之外以至微爲一身以至玄爲一世  
國於蚊之眼宅於蚊之睫以蚊之眡爲四瀆以蚊之  
眉爲六合兢兢戢戢日生九十九子兮恢恢乎宅有  
餘兮國無垓睫曾不知其有物蚊焉得以眺目是知  
盡師曠之聰而不能辨其有聲極離委之目而不能  
察其有形方且以一粟爲大塊以一塵爲大千以蚊  
睫之一涕爲大洋以蚊睫之一毛爲太山茫洋衆浮  
乎島嶼之外逍遙羣遊乎丘塗之間足以盡其性足  
以樂其天是惡知夫人世又惡知夫人世之有萬物



也哉嗚呼自其大者而言之則大鵬之大亦不足自  
其小者而言之則螻蟻之小亦有餘又安知大鵬之  
外又有大於大鵬千萬層兮螻蟻之睫又有小於螻  
蟻千萬層而各不覺其有螻蟻如今日之蚊睫而莊  
周之辯不能盡其大小也哉

三十六宮都是春賦

靜研朱以滴露兮兀積玄於羲畫由相摩而相盪揣  
剛柔之交易懿六六之互推原一元之條達究生意  
之活潑揔春風之融洽緬七竅之肇鑿位兩儀之清  
濁帝降衷乎庖犧龍負圖而河出犧欽受而默符是

劫卦焉有人推厥畫之交變窮富有之大業風天下  
兮雷地中互爲父而爲母旣以母而孕男反七日兮  
无悔又以父而生女兮柔過剛兮何咎偉始復之相  
生兮歲月窟與天根往又返兮環轉三十六兮氤氳  
然彼往兮此返孰主張而使然噫流行之磅礴悟一  
理之良能彼東君之資元兮煽和氣以薰蒸發條風  
之習習兮著萬類而鼓動開凝蟄而蠢揚暢句茁而  
敷聳花千枝以紅白葉百卉之青葱觸有形而成物  
著生理而融通縱秋冬之凝閉亦一元之進退由兩  
曜之舒慘幻羣物之成毀偉洋洋之發育均四時而



一體故四序之雖殊綱一春而爲目爰推始以至復  
觀真元之圓薄數厥爻之變易止琴高之鱗次儘默  
化而相承悟萬殊之一理諒春元與理氣用則同而  
體異嗟是道之自強在流暢之不已倘毫銖之間斷  
詎能覆而能載天不可以爲天易不可以爲易肆邵  
翁之妙觀比春畧之流澤余推彼而悟此不曰春而  
曰仁噫噫堯舜禹湯文武孔孟之事業兮一帝一王  
一師兮都是仁

七夕賦

駕紅龍兮披白霓鷲屐轂兮載雲旂河之廣兮不可

越宛中央兮我所思羞可遇兮不可從苦難會兮易  
別噫今夕兮何夕是七月之七日曰余生之陞阨紅  
顏好兮奈命薄衆女嫉余之蛾眉兮又妬余之良匹  
皇不揆余之中情信如篋之巧說皇齋怒而降譴兮  
乃夫南而婦北曰無淫而無怠兮夫可牛而婦織恩  
尚許兮相望隔一水兮盈盈嗟爾萃之牟然兮紛幾  
時乎服箱耿思君兮陴側愁擲杼兮七襄成雲錦兮  
陸離爛一機之文章人如玉兮河如銀望不極兮空  
斷腸皇捨余之相思兮許一歲兮一迎胡悠悠之七  
夕兮只年年兮一日夏之日兮長如年矐余鬢兮霜



雪生金飈於昨夜落人間之一葉遂星言兮夙駕趁  
吉日兮辰良駟躩躩兮六沛艾飄雲駟兮曳皓裳蹇  
余涉兮河之橋烏鵲飛兮北南亦既邁兮水中沚罷  
愁思兮笑談捐余玦兮水北遺余珮兮水陽子交手  
兮凝睇鼓瑟琴兮樂未央羞不可乎久留樂未央兮  
愁未極愁未極兮可如何足可惜兮此日邈後期兮  
何日又明年兮此日噫日月之有度兮苦兒女之多  
情然姮娥之未寡兮羨一日於百齡縱一歲而一遂  
亦天地之無窮忽星離而雨散兮訪舊機兮寒宮涕  
流離兮交臆人寰爲之風雨憑漢槎而聞說兮咏七

夕以爲賦

羅池廟賦

墻崩級夷兮藤絡之廟貌暝兮愁雲集蒼鼠跳梁兮  
窺古瓦甍又嘯乎梁北得樵歸而就詰兮仰柳侯之  
攸宇侯胡爲乎此妥系河東之名譜自頭角之嶮然  
稱柳氏之有子謂功業之立取逮父時而趾美嗟齒  
少而志銳竟高步而致躡爰禦魅兮柳之州路千萬  
兮其里不鄙夷而禮法兮致康和而殷富苟有令焉  
勸趨民謂公兮吾父懷故國兮曷已路脩門兮無日  
思結韜而不洩兮慨齋志而淪沒噫精爽之不昧兮



語歐魏以將死果其死而爲神兮又夢翼以祀我廟  
遂成兮羅池船兩旗兮侯來來乘駒兮以入廟蕉荔  
香兮靈徘徊陳瑤席兮玉瑱徐揚抱兮且安歌舞體  
輕兮褰裳績靈偃蹇兮從雲車日旣吉兮辰良登酒  
牲兮芳菲靈爲風兮又爲雨猿與吟兮鶴飛孰我靈  
之敢侮有醉死之過客倖旣靈而且神兮瞻揀宇兮  
玄肅余千載兮遐想獨爲公而永惜以如此之賢才  
立當日之朝廷胡炙手於彼儉兮昧趨向之常程倘  
在省而謹飭已能如乎刺史雖不食手羅池豈侯神  
之未餒叅昌黎而翱翔兮庶配饗乎聖祀矧驚動而

禍福兮曾未聞乎君子鄒之郊兮魯之原暨濊洛與  
關閩旣生榮而死哀兮寧假巫而惑民配宗社以未  
建兮與日月而昭格肯自托於荒祠兮反同歸於叢  
櫟然世降而俗末兮痛交道之不復願以柳易播之  
一節起衰季之歎服

車賦

遵達道之遑邊閱去馬與耒牛咸服役而致遠兮功  
地用之莫儔胡爾御之殊科騁雙轂之鞞鞞瞻風行  
而雷運若鬼護而神鞭問誰劊乎此制緬軒后之攸  
作思便用於陸輪肇就山而冠木爰斧彼以鉅彼按



繩墨而剖剗裁長短而曲直以縱橫而離合輪外負而體天箱內方而則地曰杠棊與輻負暨輓輓與轅輓紛旁豎而互設各持持而職職澤用抒而山侔下乃軒而上輕軸恒中而司轉蚤衛內而攝固既脂膏以塗澤又鞅鞞以牽護爰載重而涉遠御以鬣兮或角亘四海而攸同垂萬祀而不易祥曠左以妥神戎又造今巢革惟舉轎與輦輅舉推此而演益慕南指而蚩亡嘆東轍而姬衰下幾想乎泣辜後曾仰乎載師魏宜敬乎賢閭越胡禮於蛙鬪哂塗山之骨專唾沙丘之魚臭見宋力於挾軫識楚勇於起乘或投笮

而客留或窺井而壽增考雜出於經籍偉用廣而功彰苟合制而中度宜利行乎四方然御驅之有道苦顛仆之無常古明王之是懼慎登降焉以節牡孔良而孔阜馴以四而又六前孫陽以爲御後王良使執策鑿鈴鏘兮和應執如組而如琴王爰陟兮按綏輶晴晝之雷音捨靳巖之絕陁就平坦之易路惟其意之所適任翺翔而容與胡淫辟之反是謾游畋焉是事御國卜之未之駕跛驢以爲馴惟峻途焉是騁罔晝夜以轟轆哀馬逸而莫止昧轂下之胡越俄轆摧而輻裂竟輪壞而軸折前纔覆而後繼歸百王於一



轍非爾乘之不良乃爾御之非法余少師乎秦樓解  
操鞭而援轡倘爲御於我王庶或展此薄伎智爲輪  
兮人倚信爲輻兮民轉質爲杠兮旣堅禮爲策兮且  
節中正路之坦夷稅安宅之敞赫軼三代之隆昌駕  
吳唐之無爲噫哲王之已逝孰爾才之見知彼載糞  
與服蓋儘駮駟與白羲慨有車而无馬羗孰御而載  
馳徒賦車而比國曠世路而興悲

完丘賦

邈南征兮司天曠鑄鼎兮窺奸紛禹步之幻怪競傳  
芭兮迎神聒揚抱兮坎坎觸完丘之壇曼子之蕩兮

憺忘歸乃娑娑乎其間肅薦碧兮寘璵蕉匪黃兮荔  
丹瑤席展兮旣閑雜竿瑟兮俱陳浴蘭湯兮沐芳襲  
姣服兮媿娟抗皓手兮安歌芳菲菲兮旣繁舞脩容  
兮浩唱靈螭蜷兮如雲颺遠舉兮漸近爛昭昭兮示  
闡胡然天兮善窈窕君樂康兮欣欣格剪紙之繽紛  
降鷺羽之翩翩旣斯丘之案衍又斯舞之踴躍彼龍  
駕兮帝服合風迴兮雲旋喜壽我兮福我頌黍稷兮  
虬蟠然无冬兮無夏將或荒乎斯民噫太皞之遺墟  
乃聖神之陶甄胡後裔之喪德屬牝雞之司晨惑妖  
巫兮荒樂尚淫侈兮莫俊驅國人兮一丘在髻髮之



盈填爭棄隸而廢職歸一世於淫昏痛雜糅之孔極  
嘆幽明之混紛彼驚動而禍福豈王政之所關故不  
刪而編首刺陳風之訛囂作聾瞽之瞑眩開萬古之  
視聞噫敬之而遠之有吾師之格言

採菊東籬下賦

車休巾兮舟罷掉倦尋堅與經丘旣眄柯之尋常寧  
撫松而銷憂初無心於北窻俄有事乎東籬東籬兮  
何有佳菊兮籬籬薄言兮采采將以遺兮美人美人  
兮何許杳西方兮雲端豈落英可供乎夕飧吾取爾  
之酷烈昔余之種爾菊兮趁春霖之乍歇相茲土之

膏沃喜數叢之條達荷余鋤兮理荒日峻茂其枝葉  
效自聞於蘭蕙法後凋於松栢肯托根於桃蹊愧闔  
艷乎李逕結幽期於歲晚待芳姿之交映迨金飈之  
振柯露宵結而霜落迥登山而臨水但無邊之落木  
時天葩之燦爛一籬東之春色任吐芬之鮮鮮羞自  
黃而自白暎上岑兮送漚含露華而淑郁岸余頂之  
葛巾綴余嘯於東臯想孤艷於澤畔記遺芳於山椒  
掇其英兮盈把襲滿袖之菲菲采復采兮夷猶覺興  
淺而愁深擷在筐兮悵忘歸嘆規毀之已沉噫雜花  
之爭春非余心之所樂嘗朝榮而暮替任隨風兮輕



薄孰天秋而獨秀抗傲霜之高節聊一采而一嗅猶  
可愛乎馥馥亂曰采薇西山兮寧易萬鍾之祿采菊  
東籬兮何如五斗之粟前西山兮後東籬風萬古之  
六合

訓子

余惟父子之大倫兮乃居一於三五苟父之不詔以  
義方兮是陷子於違忤肆余諄諄其懋汝兮懼汝悖  
乎恒則懼汝居閑而處獨兮昧余志之竦惕懼汝臨  
事而應物兮遽輕動而妄作懼汝不謙而自抑兮遽  
肆言而悖德夫慎微而謹獨兮乃聖賢之明飭苟服

膺以脩省兮與君子而同城故夫婦之至愚兮亦有  
刑而有別處兄弟而友悌兮諒體二而氣一彼忿爭  
而參商兮宜戒之於造次况出身而事君兮忠必由  
乎孝至在勿欺而好犯兮宜盡已而效死矧長貴之  
凌妨兮鮮灾禍之不逮故下馬於鄉間兮宜鞠躬而  
敬止然遠朋之會文兮豈非信而可立寧以面而不  
石兮宜取益而義合彼僕御之賤微兮亦天生之人  
子恤常存乎飢寒兮宜厚愛而薄罪凡臨刑而畏殺  
兮體上天之好生彼恃挾而生驕兮有必剋之神明  
苟事父與事君兮暨事天而不愆是不外乎誠明兮



玄洲集  
余無間於往賢寔所勉之匪他兮孝無大於此者如  
放利而殉名兮所無望於稚艾彼徒勤其定省兮乃  
區區之末節不以色而其旨兮養非志而何屑雖日  
養其三牲兮噫不敬則何別信養志爲至孝兮奚取  
爾之立揚余幼失其怙恃兮違炯戒於趨庭咏蓼莪  
而悲淚兮慕生育之至恩念哀哀之父母兮誰使亡  
而使存今欲報其可追兮瞻昊天之間極痛風樹之  
莫逮兮泣三釜之靡及肆明發而不寐兮哀有懷其  
二人嗟霜露之時降兮人一去而無還縱欲承其嚴  
戒兮徒仿像其夢寐今余所以警汝兮乃吾考之所

志余不惕則違親兮汝不勉則違我苟以子而有違  
兮蹈不孝之大過既自警而警汝兮勉勿頽其家聲  
舜恭廩而稱大兮范折筭而臻昌陸稱德而蹈危兮  
庾承淳而乖方凡吾所以勸戒兮寔不外乎理軌既  
申之以倫彝兮又重之以物事恒臨酒而畏醉每好  
賢以易色口守瓶而出好兮戒奔馳之罔抑由內誠  
而外敬兮天乃祐而慶福助和順而奉承兮服提耳  
之善誘且念茲而在茲兮宜勿墜而勿壞

辭

發棹辭

送四郡時作



蘭爲舟兮桂爲櫂  
沂空明兮倚三島  
懷芳約兮不能  
忘望佳人兮隔烟  
浦蕭鼓吟兮旗揜  
雲旄戟豎兮天  
欲暮君愉佚兮迎  
我鼓瑟琴兮芳酒  
御滿船兮美人  
忽獨目成乎下女  
子交手兮憺忘歸  
遺玉珮兮江之  
許理芳楫兮下灘  
鳳踟蹰兮棲所  
忽雲圓兮雨收  
悵獨徃兮徒離憂

送愛州尹辭

若有人兮盼而頊  
玉色頽兮耀竒牙  
蘭爲佩兮履蕙  
綦芝裂綏兮若爲  
網旣啼鳴兮善窈  
窕又菲菲兮如  
春花合升天兮入  
紫宮荃宜邇兮不  
宜遐方整飾兮  
奉巾帨不我愠兮  
謂我嘉旋下墀兮  
翳長袖席未破  
兮回雲車輕銀臺  
兮重金樞眷西顧  
兮寵有加懷貞  
慤兮保慢愚慎終  
始兮戒參差女七  
日兮化爲龍歲  
未晏兮皆汝華邊  
風起兮城上寒我  
送君兮悲奈何



玄洲集卷之十三

Blank page with vertical lines for text.

玄洲集卷之十四

門人慎天翊 攷

祭文 十四首 哀辭 二首

文集

祭亡室文

惟靈受氣爽淑貞順天得弱失怙恃長甥是托哭泣  
之哀鄰里側耳香火六載孝聞自邇與我論婚長甥  
實倚祭已之春始執棗栗內坦外夷德音吾恍以我  
浮靡就君鋤削毫釐有失峻責可法貞亮之容炳著  
于色死生之偕與之成說黽勉有亡箕帚糟糠秉嬭  
之道主饋端明朋或自遠議厥酒食拭盤舉案賓友  
嘉服嗚呼哀哉曾未周年我遭母憂畢喪而還家食



玄淵集  
一秋賊熒猝逼海陸無路不陸而船實從叔母全家  
一葉海門風雨叔母病船泊下三鄉謂賊必遲淹度  
日星嗚呼哀哉避賊之謀吾實不臧九月十七日未  
中央凶礮忽動賊舸飛入噉嘈奔竄僵屍草澤造次  
相失父子夫婦奉老蒼黃咫尺顛仆君不在傍天胡  
曰極呱失厥乳豈日命絕走瘞道周白刃交橫呼山  
叫海晝伏宵征喪子失妻胡忍人情吾戴吾頭此時  
猶生路出蒙灘眼迷南北忽遇一人問我何客吾告  
姓名他聞卽愕云子內君惟彼道側失君之故呼天  
乞死三赴于水三被婢止節義則高性命可憐吾驚

急往他語果然握手噎泣聲畏虎聞謂必天誘此會  
未期自今相携死何悔悲主嫗揮涕嘆我生逢君卽  
賣環備食以供食何下咽叔母不在欲共還尋賊已  
環蔽君時繭足行不進程走將何歸四面鳴槍一晝  
于林相視蒼茫嗚呼哀哉是夜俵俵周章野口前戈  
後刃靡左靡右困伏叢蔓夜盡日出日將亭午猶免  
賊逼午而至未竟與賊遇嗚呼哀哉君於此時勸我  
走避勿以我故坐致彼至俄然賊至君促我出我出  
突賊裸體徒襪一奴隨我走山得脫賊去卽下日已  
昏黑獨與孽叔訪君所伏哀哀已死屍血塗草謂必



馮害撫屍踊悼嗚呼哀哉有刃在頸吾所佩刀君時  
自帶我昧其由豈意茲夕竟至自剄屍在林中吾獨  
柰何飢竄涌珍萬死苟活跟賊退勢反尋舊宅此時  
君骸已返故山十月具槨葬急以權明年曠春就食  
于洛過暮翌月爲君南國買棺改葬今已四冷嗚呼  
哀哉君爲我死我負君生君所寄鏡至今猶明今以  
新恩未掃君堂今猶告文何面幽冥嗚呼哀哉赴水  
雉頸凡嬾猶或自刃自刎烈士難必勇矣哉君夫何  
能此烈矣哉君夫何至此勇矣烈矣如其節義生死  
合道如其貞矣旌閭掩幽責在於我勒碑記德責在

於我余所不者有如此辭今夕之薦虔告深悲竄其  
倘來降鑑于茲嗚呼哀哉尚饗

祭習靜文 林權

惟靈磊磊其器嶷嶷其儀魁顏豐頰駢齒廣眉明星  
炯炯眼光照人符彩昂昂風神出塵八尺之長萬夫  
之右旣文又射又善飲酒忠孝天得友愛能事避利  
如讎嗜義於色苟蹈者義萬死且樂難奪之志不渝  
者誠崩天潰河可障而擎嗚呼值國初盪從戎倡幕  
倡動與靜公實坐作倡聲與勢公實籌畫倡故視公  
如弟如兄如足如手爲死爲生遘厲昇還未共守壘



使倡意孤獨生所惡嗚呼逮丁再剽兩湖魚爛延頸  
受刃邑夷城散公乃踵義南士響答徒手恚呼賊圍  
解匝血搏順陣以單仰堅賊沮所怵挫銳摧先官軍  
伏氣天將之歎颺告我王王寵以官嗚呼理茂以寬  
不樂竟歸爲文爲稷非志所期逢咀不肖俾奸謀忠  
于時忽忽絕意名功病憊城南藥物几杖塵棲酒瓮  
虫蠹詩鞅提挈于南眷彼鷓原築室掃庭曾未判年  
嗚呼交今不古背笑賣友滔滔射利孰敬其父公獨  
守信挽回古初吳將感義托其妻兒傳譯照肝異域  
一心仰風輸誠貫石斷金無貴無賤凡所相識疇不

悃囑死生相托嗚呼訪我草谷初自癸巳一握相期  
在沒終始謂公吾兄公以弟視逮公舉義公實我倚  
情有所迫未克究竟濕霜告别淚睫相映疚痛生平  
莫暴我貞嗚呼黑虎之秋吾病告革兄弟莫救家室  
遠隔公時赴護劇於同腹舟未載我館我南郭節時  
飲食藥餌之良迎醫視脉鍼石俱張賴此以愈得免  
死亡續命將斷云誰之力嗚呼哀哉公在城南瘡痍  
羸黑吾驚慘詰胡至此極公云致此吾所未悉端由  
麴蘖所以斷絕日黃日悴瘦到于骨遂挈以南竟不  
能北五月未旬夢我殷勤風儀仡仡恰若疇昔言我



已健勿復念及謂公必愈孰意已逝夢後不日竟承  
凶計嗚呼哀哉微斯爲痛果誰爲痛非爲公痛爲斯  
世痛非爲公悲爲國家悲始天生公謂或可期故授  
公材與忠信義胡器之宏而命之蹇文而不第歸譏  
於數才不將相吾昧其理嗚呼哀哉公之氣槩與公  
精爽宜永不泯或昇而上騎風泛雲正氣爲軒從關  
與張秉雷驅霆或爲星辰昭布蒼冥不然入地爲山  
爲岳爲江爲河怒濤揚沫炳炳心目婉婉可忘嗚呼  
哀哉公逝未暮嫂又繼亡妾有二女遺腹一子獨無  
父憐惟母之倚養嗣克孝惟寡之恃嗚呼哀哉道里

悠邈哭不以時經歲方臨情壞禮虧宿草不哭記雖  
垂說涕自無從聲未覺失靈其知耶我未哭此靈其  
知邪我奠于是靈知否乎胡不語只嗚呼哀哉

祭亡友金伯順

昌孝

惟靈淳毅其質忠愨之行舉舉以持祛傲存敬礪志  
礪學屢貢未中意何坦夷命何阻壅一命未就五旬  
斯忽嗚呼哀哉歲丁丁酉二湖盪滴兗鋒所劓僵屍  
山積造次相失恩愛莫保以兄孝慈孀子喪母舉道  
飄窳偷喘林奧嗚呼哀哉我時遘賊喪滅全家獨戴  
我頭赤軀蹈遐瘡膚繭足命餘喉隙飢仆涌岫延息



巖窟左劔右鉞獸齧巢穴四無脫路口絕糜粒氣存  
呼吸難淹晷刻嗚呼哀哉兄時向隙糊我以食卽扶  
我疾背負耆僕館我飽我不隔戶室視如同氣聚食  
共堂倉卒顛沛以走以將數月之間患難與同萬萬  
必死得君以生急人於厄親舊猶或况吾與兄曾不  
一識聞名救死古未聞知嗚呼哀哉一飯之惠丈夫  
猶懷浹月救活義誠何如感鏤心髓死無所辭北南  
懸邈承計不時逮佩南符今已踰年公私所牽帶曠  
哭遙今始歷奠我思如焚嗚呼哀哉涌山之峰龍江  
之水天荒地老或有窮已我感我思曷有其屈嗚呼

哀哉尚饗

祭元右尹文錄

惟靈惟中之慤惟外之疑惟質之堅惟氣之確惟執  
之固惟守之約墨毀廬墓負石塋築分貳姊妹自擇  
老瘠孝友之天可質神明行脩業成身立名揚介潔  
自持偉器天成嗚呼哀哉吾雖飲名曾未相識吾忝  
嶺郡公宰湖邑逮吾過湖公先侯路一夜房樓傾蓋  
如素卽與論婚公女我子金石互堅瓜葛之倚公鍾  
女愛不忍寄我吾兒贅托十五餘載公差長我我猶  
兄視嗚呼哀我吾嘗多疾聾聵腫公無片恙不切



夏冬吾謂公材實合廊廟吾謂公壽必耄與耄嗚呼  
哀哉由我雖吾不我是天何器之國而命之屯乍騫  
臺省仍謫湖縣用判而陞刺史畿甸不樂乃解盤桓  
朝列逮扈于公貳副西銓功登金秩乃牧商民俄秉  
巡節嶺海稱理還朝不日償接毛壘值虜充斥悉西  
塵糟公返卽還昧冒搶刀棲托海澨飢渴濕瘴惻悶  
顛連濟活流冗久損榮衛僅乃復命抗章獻策遂忤  
台伯偏側蹇產凡幾日月舉職京兆登對吐噫天高  
愈邈丹悃莫白嗚呼哀哉病違朝天實由忠告散居  
告省返自先壠徂秋迄冬乘馬出入兒自京來報我

康億曾未一旬凶計忽及謂夢非夢謂真豈真驚呼  
惶惑慟哭起立嗚呼哀哉我病而存公康而沒病者  
康者誰其存沒天耶鬼耶理不可測三秀列侍公常  
怡恍公胡棄去其忍未訣孫稚呱呱公常膝之公胡  
捨去其忍手釋生何有知死何昧識生知死昧知不  
如昧身縻官守無緣哭拜敢送微薄遠薦哀悃代兒  
哭奠訴此悲懇臨文荒惘辭失條節靈庶恕察以降  
以格

祭龍巖先生金公文金樹

惟靈受材之宏逢時之屯秉道而邁當否而騫抱明



揚耀天昏彌黜嗟炎撥溫廣冬愈亟掌禮典儀崩缺  
斯舉銜命奏賀肅騁天展克竣乃事班馬旋轅歷遼  
穿薊隔水鄉園方催膏轄瞻望君門孰意東天瑞日  
承夜天命丕革大聖龍翥歸將曷歸國非故國所承  
者命命安所復以聖易狂欲死近阨以身許君欲歸  
誰臣爰脫袍靴戒僕有言夫人之沒葬是借藏墓而  
不表泯跡與名丁寧付僕垂飭來昆遂返華壇輿廝  
混羣悲生樂死韜晦滅絕嗚呼哀哉登山採薇非是  
死名過墟歌麥亦出至情然猶特立名顯跡列嗚呼  
哀哉荆蠻斷文志在沉滅聖稱至德何如仲伯江頭

脫靴是乃湮沒唯其殉義至德同城事異跡同殊塗  
等轍嗚呼哀哉其心貞矣其志確矣其蹤微矣其節  
卓矣其志悲矣其德至矣吾東千古一人而已猥忝  
邑宰景仰聳感敢薦微薄冀一歆鑑嗚呼哀哉

祭河司諫文

緯地

嗚呼泰山喬岳可劉可掘先生之志不可屈也穹溟  
砥柱可馮可拔先生之操不可奪也嗚呼玉佩長裾  
非我所光金貂華秩非我所營予美無此誰適爲容  
食焉不粟服焉非衷昧命殉義遇觸乃激嗚呼風電  
袍袍寰宇辟易震霆號號生類瑟縮日月上慘收視



晦鬼神旁啗嘔呻躑躅嗚呼刀鉅斧鉞不能動髮  
火山湯海不能威藝從容不色蹈烈是篤鴻毛益輕  
金石愈確辭正義屹聖怒攸拗虧躬完節與五爲六  
嗚呼維洛法法有時而涸維烏轟轟有時而谷維其  
烈烈氣也何息猥以誦功叨宰邦域敢揭賤虔薦此  
微薄伏願英靈庶賜臨格

卒領政議申欽致祭祭文

惟靈金聲夙亮玉操彌溫才隨器稱知與行臻心存  
激揚學究天人騫清翥要歷敷愈夤班巍秩聳文雅  
益著矜持待時泛浮隨世乍履西銓猶不以施以休

咸臣負柱石姿宜祖寔倚末命之悲逮際昏惑讒慝  
構殃罪擯怵惕積有星霜肆予初載首擢登崇揀選  
陶甄一出忠公士以稱多國以之華爰虛鼎席側佇  
和羹延陞首揆望洽蒼生數四年間事多蒼黃險阻  
艱難共予備嘗以予寡昧遭時極屯若涉溟洋浩無  
涯限方期舟楫洪濟元元天胡不憖奪之斯速如魚  
失泳若鴻靡翼內逆雖夷外信將迫兵無可捍民已  
大棘予將疇依疇與爲國邈彼蒼天胡寧忍酷痛悼  
入骨涕淚交漱茲遣近臣虔薦微薄嗚呼慟哉靈庶  
歆格



祭慎佐郎哀辭 海翊

嗚呼其真死耶歟其真死而不復生耶歟嗚呼慟哉  
尚恐爲辭而祭君之靈耶歟君之兄弟自十一歲而  
從我兮小鳳雛鸞之習飛而爭鳴我提我撕之不克  
明兮兄超弟邁以日相私淑游我門凡八九載兮已  
濤江之森漠迭妙冷而蜚英兮况大闡其榜甲童顏  
頽其映花兮名一日於四國謂前路萬萬有餘兮重  
爲國而有望胡錦還之不日忽襲邪以爲恙強羸瘵  
而戾于洛志一縣以便養騫春部以歷冬兮宦非心  
而疾不愈頃一書以抵我兮云恐未免夫客鬼謂病

裡之偶言兮可不以爲深慮曾日月之幾何忽承計  
於邸報謂非真而或訛兮忍慟哭而再視有佻姪之  
簡封兮又君計以爲告嗚呼計其真而不訛信其死  
而不陽慟慈烏之嗚嗚兮自南飛兮後平生恩愛切  
今天未極哀猿嘍兮腸已絕遺孤藐兮孀不老誰所  
仰而誰所托顏三十而觀化尚云天而永情不及顏  
其五年兮天胡忍夫此酷恒禍淑而佑澆兮天何道  
之此逆嗚呼君視我其猶師吾不能視猶子弟官有  
守而路脩阻哀不能以相濟生不得以永訣死不得  
以撫櫛念吾兒之單子望公等以他日吾老病而猶



生君胡幼而奄忽兒賀賀而誰兄吾踽踽其無屬寧  
吾哀之可極竄庶幾兮未格嗚呼哀哉

哀鷹文

壬寅冬畜一鷹乃伯氏送也長不滿一尺者二寸金  
其眸玉其爪劔吻而鈎距腦額突聳尾翮整銳其短  
小精悍英猛俊烈之氣常颯颯動軒楹余甚珍之擾  
數日而獵之其始放也後雉數十丈而飛飛又不甚  
決獵者疑其不捷而望者曰鷹已出雉之前路矣遂  
與望者而望之則雉未及地而鷹之拳已加其後腦  
矣余與獵徒無不滿志又放之亦然三四放無不然

或半空而掣余旣才之日放而日皆然隨放濶數而  
獲有多小焉忽一日捨于前嶺放之者緩不守機雉  
已入藪而鷹及之鷹及之而犬隨之其藪之奧穢乃  
鴛蘿荆莽之所纏織鷹欲攫雉而出則四方上下無  
可超脫而犬之呀呀者已在其後鷹無可逃竟被其  
噬而獵者之未後之嗚呼其命矣夫余從室窻而望  
之促獵者臂未則鷹之挺於臂猶攫竦小無摧沮色  
側目厲吻怒氣益勃勃意謂無傷近座隅而審之則  
腸之出外者半尺撫其瘡則胷腔洞開若剗匏割爪  
然雖欲得半餉之命得乎俄果低頭殞翼而死余悲



憤不已卽瘞其屍于西丘之麓殺其狗而復其讎乃  
作文而哀之其文曰

蒼崖萬丈峙海中兮雲巢霧穴翊天公兮婉毫配  
猛卯驍雄兮始展鋒稜背摩穹兮鳩鳥爲媒雁網  
籠兮未掣我鞬當嚴冬兮臂出登崔西日春兮千  
峰雪虐飛走窮兮側曠寒霄聳如峰兮翻身倏霍  
電鬪風兮孤雌所伏落榛叢兮信然白獫獫所同  
兮嗅逐之疾先瘡童兮張牙雪皓舌腭紅兮四出  
無路罔西東兮哀哀謬齧碎錦胃兮終古雲長死  
呂蒙兮爲肉其讎磔厥狝兮情何聞物涕翻瞳兮

嗚呼英爽庶感通兮

月出山九井峰祈雨文

元元居土腹穀以生穀之不茂衆命攸傾國何以妥  
神何由寧今茲旱竭罔有紀極敲赤蘊隆响濕俱赤  
何苗不乾何穉不縮闔野嗷喁望望穹蒼若喝呼飲  
若呱乳吮屏屏如雨杲杲日日如戲如怒莫究而詰  
端由卑賤職忝司郡誠微撫勞政夥疵怨凡有殃罰  
宜加此身哀哉不言無告非民何辜于天何負于神  
毒虐厥命乃至斯殷肆惕齋沐虔奉誠明剖我剛鬣  
薦我粢盛神其降嗅詔龍于潭或驟或凍以澍以霖



澤我焦焚青我拈黃潤我壘塲活我一方吐曾訴臆  
肅竦冥應巖如有靈應其不肯

月出山天王峰祈雨文

維岳嶄巖鎮茲一郡名于南祀甲於羣巘業峨我祇  
靈于靈土民凡有訴罔不以報今此旱乾不日不月  
如焚如惓生類萎絕苗黃撐畝穗乾柱畦泉土井渴  
溝落渠彫魚鼈陸斃蚯蚓出枯何物不悴何草不赭  
大命近止哀哉田野猥以不才未理茲邑不忍坐視  
潔祈有日逮于三晝暫濡北陸是豈冥答增所慄惕  
今欲再肅奠此微薄喘暵所留不獲躬執敢遣祀官

者告忠血伏願山靈歆嗅精誠油然霈然霰滂滂  
以沃煖焚以活一方肆薦馨香不憚煩黷靈如有靈  
驗此昭格

天王峰再祈文

天之何爲旱如此極不日不月今垂二朔土焦山灼  
生類焚爍田無不赭百稼殂落耘者輟鋤默頌語泣  
身爲子牧愧非民則目覩心愍渙然涕睫忍看枯穗  
撐畦柱陌寧尚無生自就槁涸忍看橫目顛仆溝壑  
寧尚不粒自飢以絕政之有疵民非可罰責有所歸  
謹不辭酷厥理孔昭胡此冥漠初祈九井翊日有作



然猶乍集不踰山腹再祈遣官敬籲茲岳雖蒙驟下  
終不頃刻茲焉含憾若自燒滅力疾扶服竭衷齋肅  
靈惟親敬雖捨不職旁州英髦共我虔潔精誠所激  
不憚代祝奠雖微薄此猶可格山於此邑以靈而壓  
一世灾旱寔天所作固非茲山所可與測一郡休咎  
靈實攸職晴之雨之惟所闔闢今祭之後祇竢甘澤  
膏我四境需然而足今日不然至于明日明日又明  
終始三日如終不然是不能答非誠與物淺且薄也  
是山之靈不能福也靈與不靈此可驗識雖有馨香  
請勿更瀆

駐龍渡祈雨文

百鱗之長四靈之一噓氣成雲興雨孳物屬此長養  
乂屯膏澤霑霑如雨杲杲之日土生人口田疇龜拆  
穡夫噎泣枯稔黃縮如燂如焚大命近止由我不職  
忝守百里哀我蒼生仰我父視農爲民本無本何生  
民苟無生神罔攸寧今之不雨已逾一月虔禱月出  
靈亦不格故增悚惕莫遑寢食側聞茲渡龍神攸窟  
有祈卽應靈若符合茲卜良吉益加齋肅病闕躬訴  
遣官齎告物微而薄誠出悃府靈其降感油沛卽雨  
以凍以驟以霖以澍潤我四野實我百稼生我元元



活我郡壇太守雖劣亦長一邑龍如有靈誠無不答  
鐵吞山差貪祈雨文

崧嵩維岳鎮茲郡域孕靈澤物昭假不忒今茲亢旱  
不日不月五種不入百稼枯絕人將靡粒神曰攸托  
政之有疵罪在不職貿貿遐珉何戾之獲何辜何負  
俾將填壑寧自焚滅督民訴赤其或苛厲橫斂推剝  
其或干謁蝕蔑政法其或縱慝奪時役臘其或務利  
輒公逞愆四有一失合昭罰剋政條有犯無豫黎億  
至於奸訟至於枉獄雖示顯譴敬以身服何怒于民  
而厄于穡病未當犧代貪籲臆神如有靈格此虔惕

需以甘霖澍我靈澤以頌我穀活我壇場

食沙井祈雨文

人之所仰天與神耳何怒於人旱至于此無土不焦  
有泉皆涸何苗不枯何穗不縮穀將不秋人曷以粒  
不粒則仆或朝將夕究厥所召民非可罰良由民牧  
政夥疵慝政之有疵責在不職寧自焚灼以塞厚責  
訴天與神天神冥漠側聞茲井神龍所蟠龍既是宅  
食息郡土太守雖劣乃土之主凡所籲呼宜無不答  
頃在病篤差貪訴臆由龍不應早至此極不敢偃息  
視民塗炭扶曳力疾昧冒躬奠龍如有靈終豈無格



如澤一世聽天而作固非神龍所能擅福苟水百里  
以活一邑一龍而足龍豈可辭牲幣薦虔病告血辭  
冀沛甘澍勃興我穡一日二日踈及三日若終不雨  
寔報明誠是龍之靈終不靈也誓勿更瀆以費馨香

鐵吞山再祈文

暴早旣極上敲下焮旣春旣夏有曝無澤百苗枯落  
無望其穡氓之無辜咎在司牧凡有疵瘕不避昭責  
豈怪一格終餒是邦哀哉不言口魚胥喁頃者力疾  
敬禱浮石雖蒙乍集旋即曠澗望望之望日又日日  
今茲再祈出於悃悞病未躬顙代薦衷懇惟岳巖巖

郡所由宅嗑靈答虔實在頃刻以油以沛快注其液  
俾沃一方活我兆億叩心供誠惕竢宜隲

銘一首

硯銘

平其面唾不拭虛其中水不涸磨不磷道之確德不  
孤益者三捨則藏靜以恬以墨者通儒心



玄洲集卷之十四



